

吕后本紀第九

史記九

索隱曰吕太后本以女主臨朝自孝惠崩後立少帝而始稱制正合附惠紀而論之不然或別為吕后本紀豈得全沒孝惠而獨稱吕后本紀合依班氏分為二紀焉

吕太后著

徐廣曰吕后父吕公漢元年為臨泗侯四年卒高后元年追謚曰吕宣王

高祖微

時妃也

漢書音義曰諱雉索隱曰字娥姁也

生孝惠帝

漢書音義曰諱盈

女

魯元太后及高祖為漢王得定陶戚姬

如淳曰姬音怡衆妾

之總稱也漢官曰姬妾數百蘇林曰清河國有妃里而題門作姬墳曰漢秩祿令及茂陵書姬內官也秩比二千石位次

使仔下在七子八子之上。索隱曰如淳音怡非也茂陵書云姬是內官是矣然官號及婦人通稱姬者姬周之姓所以

左傳稱伯姬叔姬以言天子之宗女貴於他姓故遂以姬為婦人美號故詩曰雖有姬姜不棄顛悴是也

生趙隱王如意孝惠為人仁弱高祖以為不類

我常欲發太子立戚姬子如意如意類我戚姬

幸常從上之關東日夜啼泣欲立其子代太子

呂后年長常留守希見上益疏如意立為趙王

後幾代太子者數矣索隱曰幾音其紀反又音祈賴大臣爭之

及留侯策索隱曰謂張良叔孫通等令太子卑詞安車以迎四皓也太子得母廢

呂后為人剛毅佐高祖定天下所誅大臣多呂

后力呂后兄二人皆為將長兄周呂侯徐廣曰名澤高祖八

年卒謚令武侯追謚曰悼武王死事封其子呂呂為卿侯徐廣曰卿一作卿

索隱曰鄭卿台並音怡蘇林音胎子產為交侯徐廣曰台弟也次兄呂釋之

為建成侯徐廣曰惠帝二年卒謚康王高祖十二年四月甲辰

崩長樂宮太子襲號為帝是時高祖八子長男

肥孝惠兄也異母

索隱曰母曰曹姬

肥為齊王餘皆孝惠

弟戚姬子如意為趙王薄夫人子恒為代王諸
姬子子恢為梁王子友為淮陽王子長為淮南
王子建為燕王高祖弟交為楚王兄子濞為吳
王非劉氏功臣番君吳芮子臣為長沙王呂后

最怨戚夫人及其子趙王廼令永巷

如淳曰列女傳曰周宣姜

后脫簪珥待罪永巷後改為掖庭。索隱曰永巷別宮名有長巷故名之也韋昭云以為在掖門內故謂之掖庭也囚

戚夫人而召趙王使者三反趙相建平侯周昌

謂使者曰高帝屬臣趙王趙王年少竊聞太后

怨戚夫人欲召趙王并誅之臣不敢遣王王且
亦病不能奉詔呂后大怒廼使人召趙相趙相
徵至長安廼使人復召趙王王來未到孝惠帝
慈仁知太后怒自迎趙王霸上與入宮自挾與
趙王起居飲食太后欲殺之不得間孝惠元年
十二月帝晨出射趙王少不能蚤起太后聞其
獨居使人持酖飲之應劭曰酖烏食蝮以其羽畫酒中飲之立死犁明孝
惠還徐廣曰犁猶比也諸言犁明者將明之時趙王已死於是廼徙淮陽
王友爲趙王夏詔賜酈侯父追謚爲令武侯索隱
曰今音齡太后遂斷戚夫人手足去眼燬耳飲瘖藥

使居廁中命曰人彘居數日廼召孝惠帝觀人彘孝惠見問廼知其戚夫人廼大哭因病歲餘不能起使人請太后曰此非人所爲臣爲太后子終不能治天下孝惠以此日飲爲淫樂不聽政故有病也二年楚元王齊悼惠王皆來朝十月孝惠與齊王燕飲太后前孝惠以爲齊王兄置上坐如家人之禮太后怒廼酌兩卮酖置前令齊王起爲壽齊王起孝惠亦起取卮欲俱爲壽太后廼恐自起泛孝惠卮索隱曰泛音捧泛也齊王怪之因不敢飲詳醉去問知其酖齊王恐自以爲不

得脫長安憂齊內史士徐廣曰一作出說王曰太后獨有

孝惠與魯元公主如淳曰公羊傳曰天子嫁女於諸侯必使諸侯同姓者主之故謂之公主

百官表列侯所食曰國皇后公主所食曰邑諸侯王女曰公主蘇林曰公五等尊爵也春秋聽臣子以稱君父婦人稱主

有主孟昭我之比故云公主贊曰天子之女雖食湯沐之邑不君其民○索隱曰昭音徒監反按主是謂里克妻即優施

之語事見國語孟者且也言且昭我物我教汝婦事夫之道此即婦人稱主之意耳比音必二反今王有

七十餘城而公主廼食數城王誠以一郡上太

后為公主湯沐邑太后必喜王必無憂於是齊

王廼上城陽之郡尊公主為王太后如淳曰張敖子偃為魯王

故公主得為太后吕后喜許之廼置酒齊邸正義曰漢法諸侯各起邸第於

京師也樂飲罷歸齊王三年方築長安城四年就

半五年六年城就

索隱曰漢宮闕疏四年築東面五年築北面漢舊儀城方六十三里經緯

各十二里三輔舊事云城形似北斗也

諸侯來會十月朝賀七年秋八

月戊寅孝惠帝崩

皇甫謐曰帝以秦始皇三十七年生崩時年二十三

發喪太

后哭泣不下留侯子張辟彊為侍中

應劭曰入侍天子故曰侍

中
年十五謂丞相曰太后獨有孝惠今崩哭不

悲君知其解乎

正義曰解紀賣反言哭解墮有所思也又音戶賣反解節解也又紀買反謂解

說也丞相曰何解辟彊曰帝母壯子

正義曰母音無

太后畏

君等君今請拜呂台呂產呂祿為將將兵居南

北軍及諸呂皆入宮居中用事如此則太后心

安君等幸得脫禍矣丞相迺如辟彊計太后說

其哭廼哀呂氏權由此起廼大赦天下九月辛

丑葬

漢書云葬安陵皇皇覽曰山高三十二丈廣袤百二十步居地六十畝皇甫謐曰去長陵十里去長安北三十

十五里

太子即位為帝謁高廟元年號令一出太

后太后稱制議欲立諸呂為王問右丞相王陵

王陵曰高帝刑白馬盟曰非劉氏而王天下共

擊之今王呂氏非約也太后不說問左丞相陳

平絳侯周勃等對曰高帝定天下王子弟今

太后稱制王昆弟諸呂無所不可太后豈能朝

王陵讓陳平絳侯曰始與高帝嘔血盟

索隱曰嘔鄒音使接

反又云或作嘔又音丁牒反

諸君不在邪今高帝崩太后女主

欲王呂氏諸君縱欲阿意背約何面目見高帝
地下陳平絳侯曰於今面折廷爭臣不如君夫
全社稷定劉氏之後君亦不如臣王陵無以應
之十一月太后欲發王陵乃拜為帝太傅

應劭曰古

官傳者覆也贊曰大戴禮曰傳之德義

奪之相權王陵遂病免歸廼以

左丞相平為右丞相以辟陽侯審食其為左丞

相索隱曰韋昭云辟陽信都之縣名

左丞相不治事令監宮中如郎

中令食其故得幸太后常用事入公卿皆因而決
事廼追尊酈侯父為悼武王欲以王諸呂為漸
四月太后欲侯諸呂廼先封高祖之功臣郎中

令無擇

徐廣曰姓馮

為博城侯

正義曰括地志云兗州博城本漢博城縣城

魯

元公主薨賜諡為魯元太后子偃為魯王魯王

父宣平侯張敖也封齊悼惠王子章為朱虛侯

索隱曰虛音墟琅邪縣也。正義曰括地志云朱虛故城在青州臨朐縣東六十里漢朱虛也十三州志云丹朱遊故虛

故云朱虛也虛猶丘也朱猶丹也

以呂祿女妻之齊丞相壽為平

定侯

徐廣曰姓齊

少府延為梧侯

徐廣曰姓陽成也延以軍匠起作宮築城也

乃封呂種為沛侯

徐廣曰釋之之子也。正義曰括地志云徐州沛縣古城也

呂平

為扶柳侯

徐廣曰呂后姊子也母字長姁。正義曰括地志云扶柳故城在冀州信都縣西三十里漢扶

柳縣也有澤澤中多柳故曰扶柳

張買為南呂侯

徐廣曰其父越人為高祖騎將太

后欲王呂氏先立孝惠後宮子彊為淮陽王

昭

曰今陳留郡

子不疑為常山王

正義曰括地志云常山故城在恒州真定縣南八里本漢

東垣邑也

子山為襄成侯

索隱曰按下文更名義又改名弘農漢書襄成侯唯云名弘蓋史省

文耳按志襄城屬潁川

子朝為軹侯

索隱曰韋昭云河內有軹縣音紙。正義曰括地志云故

軹城在懷州終原縣東南十三里七國時魏邑

子武為壺關侯太后風大臣

大臣請立酈侯呂台為呂王

正義曰初呂台為呂王後呂產王梁更名梁曰

呂

太后許之建成侯釋之卒嗣子有罪廢立

其弟呂祿

徐廣曰釋之少子

為胡陵侯

正義曰縣名屬山陽章帝改曰胡陸

續

康侯後二年常山王薨以其弟襄成侯山為常

山王更名義十一月呂王台薨謚為肅王太子

嘉代立為王三年無事

漢書云秋星晝見

四年封呂頊為

臨光侯呂他為俞侯

索隱曰他音施俞音輸。正義曰括地志云故飾城在德州平原縣

西南三十里本漢飾縣呂他邑也

呂更始為贅其侯

徐廣曰表云呂后弟子淮陽丞

相呂勝為贅其侯。索隱曰按表贅其在臨淮

呂忿為呂成侯

正義曰括地志云故呂城在鄧

州南陽陽縣西三十里呂尚先祖封

及諸侯丞相五人

徐廣曰中邑侯朱通山都侯王恬開

松茲侯徐厲滕侯呂更始醴陵侯越

宣平侯女為孝惠皇后時無子

正義曰劉伯莊云諸美人元幸呂氏懷身而入宮生

詳為有身取美人子名之

子殺其母立所名子為太子孝惠崩太子立為

帝帝壯或聞其母死非真皇后子迺出言曰后

安能殺吾母而名我我未壯壯即為變太后聞

而患之恐其為亂迺幽之永巷中言帝病甚左

右莫得見太后曰凡有天下治爲萬民命

徐廣曰一

無此字

者蓋之如天容之如地上有懽心以安百

姓百姓欣然以事其上懽欣交通而天下治今
皇帝病久不已廼失惑惛亂不能繼嗣奉宗廟
祭祀不可屬天下其代之羣臣皆頓首言皇太
后爲天下齊民計所以安宗朝社稷甚深羣臣
頓首奉詔帝廢位太后幽殺之五月丙辰立常
山王義爲帝更名曰弘不稱元年者以太后稱
天下事也以軹侯朝爲常山王置太尉官絳侯
勃爲太尉五年八月淮陽王薨以弟壺關侯武

爲淮陽王六年十月太后曰呂王璹居處驕恣
廢之以肅王台弟呂產爲呂王夏赦天下封齊
悼惠王子興居爲東牟侯索隱曰韋昭云東萊縣七年正月
太后召趙王友友以諸呂女爲后弗愛愛他姬
諸呂女妬怒去讒之於太后誣以罪過曰呂氏
安得王太后百歲後吾必擊之太后怒以故召
趙王趙王至置邸不見令衛圍守之弗與食其
羣臣或竊饋輒捕論之趙王餓乃歌曰諸呂用
事兮劉氏危迫脅主侯兮彊授我妃我妃旣妬
兮誣我以惡讒女亂國兮上曾不寤我無忠臣

方何故弃國自決中野方蒼天舉直

徐廣曰舉一作與

于

嗟不可悔方寧蚤自財爲王而餓死方誰者憐之呂氏絕理方託天報仇丁丑趙王幽死以民禮葬之長安民冢次己丑日食晝晦太后惡之心不樂乃謂左右曰此爲我也二月徙梁王恢爲趙王呂王產徙爲梁王梁王不之國爲帝太傅立皇子平昌侯太爲呂王更名梁曰呂呂曰濟川太后女弟呂嬃

索隱曰韋昭云嬃嬃妻封林光侯

有女爲營陵

侯劉澤妻澤爲大將軍太后王諸呂恐即崩後劉將軍爲害廼以劉澤爲琅邪王以慰其心梁

王恢之徙王趙心懷不樂太后以呂產女爲趙王后王后從宦官諸呂擅權微伺趙王趙王不得自恣王有所愛姬王后使人酖殺之王乃爲歌詩四章令樂人歌之王悲六月即自殺太后聞之以爲王用婦人弃宗廟禮廢其嗣宣平侯張敖卒以子偃爲魯王敖賜謚爲魯元王秋太后使使告代王欲徙王趙代王謝願守代邊太傅產丞相平等言京武信侯呂祿徐廣曰呂后兄子也前封胡陵侯蓋號曰上侯位次第一如淳曰功大者位在上功臣表有第一第二之次也請立爲趙王太后許之追尊祿父康侯爲趙昭王九月

燕靈王建薨有美人子太后使人殺之無後國

除八年十月立呂肅王子東平侯呂通為燕王

封通弟呂莊為東平侯三月中呂后拔還正義曰拔芳弗

反又音發後同過軹道見物如蒼犬據徐廣曰音戟高后掖忽弗

復見卜之云趙王如意為祟高后遂病掖傷高

后為外孫魯元王偃年少蚤失父母孤弱廼封

張敖前姬兩子修為新都侯壽為樂昌侯徐廣曰今

細陽之池陽鄉以輔魯元王偃及封中大謁者張釋為建

陵侯徐廣曰一云張釋卿駟案如淳曰百官表謁者掌賓贊受事權嬰為中謁者後常以奄人為之諸官加中者多

奄人也呂榮為祝茲侯徐廣曰呂后昆弟子諸中宦者令丞皆

為關內侯食邑五百戶

如淳曰列侯出關就國關內侯但爵其身有加異者與關

內之邑食其租稅也風俗通義曰秦時六國未平將帥皆家關中稱關內侯

七月中高后病

甚廼令趙王呂祿為上將軍軍北軍呂王產居

南軍呂太后誡產祿曰高帝已定天下與大臣

約曰非劉氏王者天下共擊之今呂氏王大臣

弗平我即崩帝年少大臣恐為變必據兵衛宮

慎毋送喪毋為人所制辛巳高后崩遺詔賜諸

侯王各千金

蔡邕曰皇子封為王者其實古諸侯也加號稱王故謂之諸侯王王子封為侯者謂之諸

侯將相列侯郎吏皆以秩賜金大赦天下以呂

王產為相國以呂祿女為帝后高后已葬

皇甫謐曰

合葬長陵皇覽曰高帝呂后山各一所也

以左丞相審食其爲帝太傅朱
虛侯劉章有氣力東牟侯興居其弟也皆齊哀
王弟居長安當是時諸呂用事擅權欲爲亂畏
高帝故大臣絳灌等未敢發朱虛侯婦呂祿女
陰知其謀恐見誅廼陰令人告其兄齊王欲令
發兵西誅諸呂而立朱虛侯欲從中與大臣爲
應齊王欲發兵其相弗聽八月丙午齊王欲使
人誅相相召平廼反舉兵欲圍王王因殺其相
遂發兵東詐奪琅邪王兵并將之而西語在齊
王語中齊王廼遺諸侯王書曰高帝平定天下

王諸子弟悼惠王王齊悼惠王薨孝惠帝使留侯良立臣為齊王孝惠崩高后用事春秋高聽

諸呂擅發帝更立又比殺三趙王

索隱曰比音如字比猶類也趙

隱王如意趙幽王友趙王恢是三趙王也

滅梁趙燕以王諸呂分齊為四

忠臣進諫上惑亂弗聽今高后崩而帝春秋富未能治天下固恃大臣諸侯而諸呂又擅自尊官聚兵嚴威劫列侯忠臣矯制以令天下宗廟所以危寡人率兵入誅不當為王者漢聞之相國呂產等廼遣潁陰侯灌嬰將兵擊之灌嬰至滎陽廼謀曰諸呂權兵關中欲危劉氏而自立

今我破齊還報此益呂氏之資也廼留屯滎陽
使使諭齊王及諸侯與連和以待呂氏變共誅
之齊王聞之廼還兵西界待約呂祿呂產欲發
亂關中內憚絳侯朱虛等外畏齊楚兵又恐灌
嬰畔之欲待灌嬰兵與齊合而發猶豫未決

索隱

曰猶鄒音以獸反與音預又作豫崔浩云猶猿類也印臯長
尾性多疑又說文云猶獸名多疑故比之也按狐性亦多疑

度水而聽水聲故云狐疑也今解者又引老子與猶子冬涉
川猶子若畏四隣故以為猶與且按狐聽水而此云猶子冬
涉川則猶與是狐類不疑若畏四隣則當是時濟川王
猶定是獸自不保同類故云畏四隣也

太淮陽王武常山王朝名為少帝弟及魯元王
呂后外孫皆年少未之國居長安趙王祿梁王

史記呂后紀

產各將兵居南北軍皆呂氏之人列侯羣臣莫
自堅其命太尉絳侯勃不得入軍中主兵曲周
侯酈商老病其子寄與呂祿善絳侯廼與丞相
陳平謀使人劫酈商令其子寄往給說呂祿曰
高帝與呂后共定天下劉氏所立九王索隱曰吳楚齊淮南
皆大臣之議事已布告諸侯諸侯皆以為宜今
太后崩帝少而足下佩趙王印不急之國守藩
廼為上將將兵留此為大臣諸侯所疑足下何
不歸將印以兵屬太尉請梁王歸相國印與大

琅邪代常山王朝淮陽王武濟川王太是九王也

呂氏立三王

索隱曰梁王產趙王祿趙王通也

呂后紀

臣盟而之國齊兵必罷大臣得安足下高枕而
王千里此萬世之利也呂祿信然其計欲歸將
印以兵屬太尉使人報呂產及諸呂老人或以
爲便或曰不便計猶豫未有所決呂祿信酈寄
時與出游獵過其姑呂嬃嬃大怒曰若爲將而
弃軍呂氏今無處矣

索隱曰酈師古以爲言見誅滅無處所也

廼悉出珠

玉寶器散堂下曰毋爲他人守也左丞相食其
免八月庚申旦平陽侯窋行御史大夫事見相
國產計事郎中令賈壽使從齊來因數產曰王
不蚤之國今雖欲行尚可得邪具以灌嬰與齊

楚合從欲誅諸呂告產廼趣產急入宮平陽侯

頗聞其語廼馳告丞相太尉太尉欲入北軍不

得入襄平侯通

徐廣曰姓紀

尚符節

張晏曰紀信子也尚主也今符節令○索

隱曰張晏云紀信子又晉灼云信被焚死不見有後按功臣表襄平侯紀通父成以將軍定三秦死事子侯則通非信子

張說謬誤

廼令持節矯內太尉北軍太尉復令酈寄

與典客劉揭

漢書百官表曰典客秦官也掌諸侯歸義蠻夷

先說呂祿曰帝

使太尉守北軍欲足下之國急歸將印辭去不

然禍且起呂祿以為酈兄

徐廣曰音況字也名寄

不欺已遂

解印屬典客而以兵授太尉太尉將之入軍門

行令軍中曰為呂氏右禮為劉氏左禮軍中皆

左禮為劉氏太尉行至將軍呂祿亦已解上將
印去太尉遂將北軍然尚有南軍平陽侯聞之
以呂產謀告丞相平丞相平廼召朱虛侯佐太
尉太尉令朱虛侯監軍門令平陽侯告衛尉毋
入相國產殿門呂產不知呂祿已去北軍廼入
未央宮欲為亂殿門弗得入徘徊往來平陽侯
恐弗勝馳語太尉太尉尚恐不勝諸呂未敢訟
言誅之

徐廣曰訟一作公駟案韋昭曰訟猶公也。索隱曰韋昭以訟為公徐廣亦云然蓋公為得之公言

猶明言也又解者云訟誦說也

廼遣朱虛侯謂曰急入宮衛帝朱

虛侯請卒太尉予卒千餘人入未央宮門遂見

產廷中日餉時遂擊產產走天風大起以故其

從官亂莫敢鬪逐產殺之郎中府吏廁中

如淳曰百

官表郎中令掌宮殿門戶故其府在宮中後轉為光祿勳也

朱虛侯已殺產帝命謁

者持節勞朱虛侯朱虛侯欲奪節信謁者不肯

朱虛侯則從與載因節信馳走斬長樂衛尉呂

更始還馳入北軍報太尉太尉起拜賀朱虛侯

曰所患獨呂產今已誅天下定矣遂遣人分部

悉捕諸呂男女無少長皆斬之辛酉捕斬呂祿

而笞殺呂頹使人誅燕王呂通而發魯王偃壬

戌以帝太傅食其復為左丞相戊辰徙濟川王

王梁立趙幽王子遂爲趙王遣朱虛侯章以誅諸呂氏事告齊王令罷兵灌嬰兵亦罷滎陽而歸諸大臣相與陰謀曰少帝及梁淮陽常山王皆非眞孝惠子也呂后以計詐名他人子殺其母養後宮今孝惠子之立以爲後及諸王以彊呂氏今皆已夷滅諸呂而置所立即長用事吾屬無類矣不如視諸王最賢者立之或言齊悼惠王高帝長子今其適子爲齊王推本言之高帝適長孫可立也大臣皆曰呂氏以外家惡而幾危宗廟亂功臣今齊王母家駟鈞鈞惡人也

即立齊王則復為呂氏欲立淮南王以為少母
 家又惡廼曰代王方今高帝見子最長仁孝寬
 厚太后家薄氏謹良且立長故順以仁孝聞於
 天下便廼相與共陰使人召代王代王使人辭
 謝再反然後乘六乘傳張晏曰備漢朝有變欲馳還也或曰傳車六乘後九
 月文穎曰即閏九月也時律曆發不知閏謂之後九月也或以十月為歲首至九月則歲終後九月則閏月晦日
 己酉至長安舍代邸大臣皆往謁奉天子璽上
 代王共尊立為天子代王數讓君臣固請然後
 聽東牟侯興居曰誅呂氏吾無功請得除宮廼
 與太僕汝陰侯滕公入宮前謂少帝曰足下非

劉氏不當立乃顧麾左右執戟者陪兵罷去

徐廣

音倍

有數人不肯去兵臣者令張澤諭告亦去

兵滕公廼召乘輿車載少帝出

蔡邕曰律曰敢盜乘輿服御物天子

至尊不敢深瀆言之故託於乘輿也乘猶載也輿猶車也天子以天下為家不以京師宮室為常處則當乘車輿以行天下故羣臣託乘輿以言少帝曰欲將我安之乎滕公

曰出就舍舍少府廼奉天子法駕

蔡邕曰天子有大駕小駕法駕

上乘金根車駕六馬有五時副車駕四馬侍中參乘屬車三十六乘

迎代王於邸報曰宮

謹除代王即夕入未央宮有謁者十人持戟衛

端門曰天子在也足下何為者而入代王廼謂

太尉太尉往諭謁者十人皆陪兵而去代王遂

入而聽政夜有司分部誅滅梁淮陽常山王及少帝於邸代王立爲天子二十三年崩謚爲孝文皇帝

太史公曰孝惠皇帝高后之時黎民得離戰國之苦君臣俱欲休息乎無爲故惠帝垂拱高后女主稱制政不出房戶天下晏然刑罰罕用罪人是希民務稼穡衣食滋殖

索隱述贊曰

高祖猶微

呂氏作妃

及正軒掖

尚私食其

志懷安忍

性挾猜疑

置煬齊悼

殘暴戚姬

孝惠崩殯

其哭不悲

諸呂用事

天下示私

大臣趙醢

支孽交夷

禍盈斯驗

蒼狗爲雷

史肆阡伍伯單捌字

注貳阡壹伯伍拾肆字

呂后本紀第九

史記九

孝文本紀第十

史記十

孝文皇帝

漢書音義曰諱恒

高祖中子也高祖十一年春

已破陳豨軍定代地立為代王都中都

正義曰括地志云中

都故城在汾州平遙縣西南十二里秦屬太原郡也

太后薄氏子即位十七年

高后八年七月高后崩九月諸呂呂產等欲為

亂以危劉氏大臣共誅之謀召立代王事在呂

后語中丞相陳平太尉周勃等使人迎代王代

王問左右郎中令張武等張武等議曰漢大臣

皆故高帝時大將習兵多謀詐此其屬意非止

此也特畏高帝呂太后威耳今已誅諸呂新噫

血京師

公羊傳曰京大師衆也天子之居必以衆大之辭言也○索隱曰漢書嘽作喋音玷丁牒反漢書陳

湯杜業皆言喋血無盟歟事廣雅云喋履也謂履涉之

此以迎大王爲名實不

可信願大王稱疾毋往以觀其變中尉宋昌進

曰

索隱曰東觀漢記宋楊傳宋義後有宋昌又會稽典錄昌宋義孫也

羣臣之議皆非也

夫秦失其政諸侯豪桀並起人人自以爲得之

者以萬數然卒踐天子之位者劉氏也天下絕

望一矣高帝封王子弟地犬牙相制

索隱曰言封子弟境土交

接若犬之牙不正相當而相銜入也

此所謂磐石之宗也

索隱曰言其固如磐石此

語見太公六韜

天下服其彊二矣漢興除秦苛政約法令

施德惠人人自安難動搖三矣夫以呂太后之

嚴立諸呂為三王擅權專制然而太尉以一節

入北軍

索隱曰即紀通所矯帝之節

一呼士皆左袒為劉氏叛

諸呂卒以滅之此乃天授非人力也今大臣雖
欲為變百姓弗為使其黨寧能專一邪方今內
有朱虛東牟之親外畏吳楚淮南琅邪齊代之
彊方今高帝子獨淮南王與大王大王又長賢
聖仁孝聞於天下故大臣因天下之心而欲迎
立大王大王勿疑也代王報太后計之猶與未
定卜之龜卦兆得大橫

應劭曰以荆灼龜文正橫

占曰大橫庚

庚余為天王夏啓以光

服虔曰庚橫貌也李奇曰庚其繇文也張晏曰橫行無思

不服庚更也言去諸侯而即帝位也先是五帝官天下老則禪賢王啓始傳父爵乃能光治先君之基業文帝亦襲父迹言似夏啓者也○索隱曰荀悅云大橫龜兆橫理也按庚猶更言以諸侯更帝位也絲抽也所以抽出吉凶之情也杜預云絲兆辭也音胄漢書蓋寬饒云五帝官天下三王家天下官以傳賢人家以傳子孫官猶公也謂不私也

代王

曰寡人固已爲王矣又何王卜人曰所謂天王者乃天子於是代王乃遣太后弟薄昭往見絳侯絳侯等具爲昭言所以迎立王意薄昭還報曰信矣母可疑者代王乃笑謂宋昌曰果如公言乃命宋昌參乘張武等六人乘傳詣長安至高陵休止

正義曰括地志云高陵故城在雍州高陵縣西南一里本名橫橋架渭水上三輔舊事云秦於

渭南有輿官渭北有咸陽宮秦昭王欲通二宮之間造橫長橋三百八十步橋北京石水中舊有留神象此神曾與魯班

語班令其出留曰我負醜卿善圖物容不出班於是拱手與語曰出頭見我留乃出首班以脚畫地付留覺之便沒水故置其象於水上唯有晉以上而使宋昌先馳之長安

觀變昌至渭橋

蘇林曰在長安北三里。索隱曰三輔故事咸陽宮在渭北興樂宮在渭南秦

昭王通兩宮之間作渭橋長三百八十步又關中記云石柱以北屬扶風石柱以南屬京兆也丞相以下

皆迎宋昌還報代王馳至渭橋羣臣拜謁稱臣

代王下車拜太尉勃進曰願請問言

索隱曰包愷音閑言欲向

空間處語顏師古云間容也猶言中間請容暇之頃當有所陳不欲即公論也

宋昌曰所言公

公言之所言私王者不受私太尉乃跪上天子

璽符代王謝曰至代邸而議之

索隱曰說文云邸屬國舍

遂馳

入代邸羣臣從至丞相陳平太尉周勃大將軍

陳武御史大夫張蒼宗正劉郢

漢書百官表曰宗正秦官應劭曰周

成王時彤伯入為宗正

朱虛侯劉章東牟侯劉興居典客劉

揭皆再拜言曰子弘等皆非孝惠帝子不審奉

宗廟臣謹請與陰安侯

蘇林曰高帝兄伯妻義頡侯終母丘嫂也

列侯

頃王后

徐廣曰代頃王劉仲之妻駟案蘇林曰仲子渾為吳王故追謚為頃王也如淳曰頃王后封陰安侯

時呂須為林光侯蕭何夫人亦為鄭侯又宗室表此時無陰安知其為頃王后也。索隱曰按蘇林徐廣韋昭以為二入

封號而樂彥如淳以頃王后別封陰安侯與漢祠令相會今以陰安是別人封爵非也頃王后是代頃王后文帝之伯母

代王降為郤陽侯故云列侯頃王后韋昭曰陰安屬魏郡也

與琅邪王宗室大臣列

侯吏二千石議曰大王高帝長子宜為高帝嗣

願大王即天子位代王曰奉高帝宗廟重事也

孝文紀

寡人不佞不足以稱宗廟願請楚王計宜者

蘇林

曰楚王名交高帝弟○索隱曰交高帝弟最尊言更請楚王計宜者故下云皆為宜也

寡人不敢當

羣臣皆伏固請代王西鄉讓者三南鄉讓者再

如淳曰讓羣臣也或曰賓主位東西面君臣位南北面故西鄉坐三讓不受羣臣猶稱宜乃更迴坐示變即君位之漸也

丞相平等皆曰臣伏計之大王奉高帝宗廟最

宜稱雖天下諸侯萬民以為宜臣等為宗廟社

稷計不敢忽願大王幸聽臣等臣謹奉天子璽

符再拜上代王曰宗室將相王列侯以為莫宜

寡人寡人不敢辭遂即天子位羣臣以禮次侍

乃使太僕嬰與東牟侯興居清宮

應劭曰舊典天子行幸所至必

遣靜宮令先案行清靜殿中以虞非常。○索隱曰按漢儀云皇帝起居索室清宮而後行。奉天子法駕

迎于代邸

索隱曰漢官儀云天子鹵簿有大駕法駕小駕大駕公卿奉引大將軍參乘屬車八十一乘法

駕公卿不在鹵簿中惟京兆尹執金吾長安令奉引侍中參乘屬車三十六乘皇帝即日夕入

未央宮乃夜拜宋昌為衛將軍鎮撫南北軍以

張武為郎中令行殿中還坐前殿於是夜下詔

書曰間者諸呂用事擅權謀為大逆欲以危劉

氏宗廟賴將相列侯宗室大臣誅之皆伏其辜

朕初即位其赦天下賜民爵一級女子百戶牛

酒

蘇林曰男賜爵女子賜牛酒。索隱曰按封禪書云百戶牛一頭酒十石樂彥云婦人無夫或無子不需爵故賜之

酺五日

文穎曰漢律三人已上無故羣飲罰金四兩今詔橫賜得令會聚飲食五日。索隱曰說文云酺王

者布德大飲酒也出錢為釀出食為酺又按
趙武靈王滅中山酺五日是其所起遠也

孝文皇帝元年十月庚戌徙立故琅邪王澤為

燕王辛亥皇帝即阼

正義曰王人階也

謁高廟右丞相平

正義曰此時尚右

徙為左丞相太尉勃為右丞相大將軍

灌嬰為太尉諸呂所奪齊楚故地皆復與之壬

子遣車騎將軍薄昭迎皇太后于代皇帝曰呂

產自置為相國呂祿為上將軍擅矯遣灌將軍

嬰將兵擊齊欲代劉氏嬰留滎陽弗擊與諸侯

合謀以誅呂氏呂產欲為不善丞相陳平與太

尉周勃謀奪呂產等軍朱虛侯劉章首先捕呂

產等太尉身率襄平侯通持節承認入北軍典
客劉揭身奪趙王呂祿印益封太尉勃萬戶賜
金五千斤丞相陳平灌將軍嬰邑各三千戶金
二千斤朱虛侯劉章襄平侯通東牟侯劉興居
邑各二千戶金千斤徐廣曰十一月辛丑封典客揭爲陽信
侯索隱曰韋昭云勃海縣。正義曰括地志云陽信故城在滄州無棣縣東南二十里漢陽信縣賜金千
斤十二月上曰法者治之正也所以禁暴而率
善人也今犯法已論而使母罪之父母妻子同
產坐之及爲收帑朕甚不取其議之有司皆曰
民不能自治故爲法以禁之相坐坐收所以累

其心使重犯法所從來遠矣如故便上曰朕聞
法正則民慤罪當則民從且夫牧民而導之善
者吏也其既不能導又以不正之法罪之是反
害於民爲暴者也何以禁之朕未見其便其熟
計之有司皆曰陛下加大惠德甚盛非臣等所
及也請奉詔書除收帑諸相坐律令

應劭曰帑子也秦法一人

有罪并坐其家
室今除此律

正月有司言曰蚤建太子所以尊

宗廟請立太子上曰朕既不德上帝神明未歆

享天下人民未有嘽志

索隱曰嘽者不滿之意也未
有嘽志言天下皆志不滿也

漢書嘽作
慤音篋

今縱不能博求天下賢聖有德之人而

禪天下焉而曰豫建太子是重吾不德也謂天

下何其安之

索隱曰言何以謂於天下也其發聲也安者徐也言徐徐且待也

有司曰

豫建太子所以重宗廟社稷不忘天下也上曰

楚王季父也春秋高閱天下之義理多矣

如淳曰閱

猶言多所更歷也

明於國家之大體吳王於朕兄也惠仁

以好德淮南王弟也秉德以陪朕

文穎曰陪輔也

豈爲

不豫哉諸侯王宗室昆弟有功臣多賢及有德

義者若舉有德以陪朕之不能終是社稷之靈

天下之福也今不選舉焉而曰必子人其以朕

爲忘賢有德者而專於子非所以憂天下也朕

甚不取也有司皆固請曰古者殷周有國治安皆千餘歲古之有天下者莫不長焉用此道也

索隱曰言古之有天下者無長於立子故云莫長焉用此道者用殷周立子之道故安治千有餘歲也

立嗣

必子所從來遠矣高帝親率士大夫始平天下建諸侯爲帝者太祖諸侯王及列侯始受國者皆亦爲其國祖子孫繼嗣世世弗絕天下之大義也故高帝設之以撫海內今釋宜建而更選於諸侯及宗室非高帝之志也更議不宜

索隱曰言

不宜更別議

子某最長純厚慈仁請建以爲太子

上乃許之因賜天下民當代父後者爵各一級

韋昭曰文

帝以立子為後不欲獨饗其福故賜天下為父後者爵封將軍薄昭為軹侯徐廣

曰正月乙巳也三月有司請立皇后薄太后曰諸侯皆同

姓立太子母為皇后索隱曰謂帝之子為諸侯王皆同姓姓生也言皆同母生故立太子

也母皇后姓竇氏上為立后故賜天下鰥寡孤獨

窮困及年八十已上孤兒九歲已下布帛米肉

各有數上從代來初即位施德惠天下填撫諸

侯四夷皆洽驩乃循從代來功臣上曰方大臣

之誅諸呂迎朕朕狐疑皆止朕唯中尉宋昌勸

朕朕以得保奉宗廟已尊昌為衛將軍其封昌

為壯武侯徐廣曰四月辛亥封封三十四年景帝中四年

奪侯國除○索隱曰韋昭云膠東縣○正義曰

括地志云壯武故城在萊州即墨縣西六十里古萊夷國有漢壯武縣故城

諸從朕六人官

皆至九卿

正義曰漢置九卿一曰太常二曰光祿三曰衛尉四曰太僕五曰廷尉六曰大鴻臚七曰宗正

八曰大司農九曰少府是為九卿也

上曰列侯從高帝入蜀漢中者

六十八人皆益封各二百戶故吏二千石以上

從高帝潁川守尊等十人食邑六百戶淮陽守

申徒嘉等十人五百戶衛尉定等十人四百戶

封淮南王舅父趙兼為周陽侯

正義曰括地志云周陽故城在絳州

聞喜縣東二十九里

齊王舅父駟鈞為清郭侯

如淳曰邑名六國時齊有清郭

君清音靜○索隱曰按表駟鈞封駟侯不同者蓋後徙封於鄒鄒屬鉅鹿

秋封故常山丞相

蔡兼為樊侯

索隱曰韋昭云樊東平縣名○正義曰括地志云漢樊縣城在兗州瑕丘西南二十

五里地理志云樊縣古樊國仲山甫所封

人或說右丞相曰君本誅諸呂

迎代王今又矜其功受上賞處尊位禍且及身

右丞相勃乃謝病免罷左丞相平專為丞相

徐廣

曰八月八

二年十月丞相平卒復以絳侯勃為丞相上曰

朕聞古者諸侯建國千餘歲各守其地以時入

貢民不勞苦上下驩欣靡有遺德今列侯多居

長安邑遠吏卒給輸費苦而列侯亦無由教馴

其民

正義曰馴古訓字

其令列侯之國為吏及詔所止者

遣太子

張晏曰為吏謂以卿大夫為兼官者詔所止特以恩愛見留者

十一月晦日有

食之

正義曰按說文云日蝕則朔月蝕則望而云晦日蝕之恐曆錯誤

十二月望日又

食

徐廣曰此云望日又食案漢書及五行志無此日食文也一本作月食然史書不紀月食

上曰朕聞

之天生蒸民爲之置君以養治之人主不德布政不均則天示之以菑以誠不治乃十一月晦日有食之適見于天菑孰大焉朕獲保宗廟以微眇之身託于兆民君王之上天下治亂在朕一人唯二三執政猶吾股肱也朕下不能理育羣生上以累三光之明其不德大矣令至其悉思朕之過失及知見思之所不及白以告朕及舉賢良方正能直言極諫者以匡朕之不逮因

各飭其任職務省繇費以便民朕既不能遠德

故憫然念外人之有非漢書音義曰憫然猶介然也非奸非也。索隱曰蘇林云

憫寢視不安之貌蓋近其意餘說皆疎音下板反是以設備未息今縱不能

罷邊屯戍而又飭兵厚衛其罷衛將軍軍太僕

見馬遺財足索隱曰遺猶留也財字與纔同言太僕見在之馬今留纔足充事也餘皆

以給置傳索隱曰按廣雅云置驛也續漢書云驛馬三十里一置故樂彥亦云傳置一也言乘傳者以傳

次受名乘置者以馬取匹傳音丁戀反如淳云律四馬高足為傳置四馬中足為馳置下足為乘置一馬二馬為軺置急

乘一馬正月上曰農天下之本其開籍田應劭曰古者天子耕

籍田千畝為天下先籍者帝王典籍之常韋昭曰籍借也借民力以治之以奉宗廟且以勸率天下使務農也景帝

詔曰朕親耕后親桑為天下先本以躬親為義不得以假借為稱也籍蹈籍也朕親率耕以給

宗廟采盛

應劭曰黍稷曰采在器中曰盛

三月有司請立皇子爲

諸侯王上曰趙幽王幽死朕甚憐之已立其長

子遂爲趙王遂弟辟彊及齊悼惠王子朱虛侯

章東牟侯興居有功可王乃立趙幽王少子辟

彊爲河間王以齊劇郡立朱虛侯爲城陽王立

東牟侯爲濟北王皇子武爲代王子參爲太原

王子揖爲梁王上曰古之治天下朝有進善之

旌

應劭曰旌幡也堯設之五達之道令民進善也如淳曰欲有進善者立於旌下言之

誹謗之木

虞

曰堯作之橋梁交午柱頭應劭曰橋梁邊板所以書政治之愆失也至秦去之今乃復施也○索隱曰按尸子云堯立誹

謗之木誹音非亦音沸韋昭云憲政有闕失使書於木此堯時然也後代因以爲飾今宮外橋梁頭四柱木是鄭玄註禮

云一縱一橫為午謂以木貫表柱四出即今之華表崔浩以

為木貫柱四出名桓陳楚俗桓聲近和又云和表則華與和

又相訛也所以通治道而來諫者今法有誹謗妖言

之罪是使眾臣不敢盡情而上無由聞過失也

將何以來遠方之賢良其除之民或祝詛上以

相約結而後相謾漢書音義曰民相結共祝詛上也謾者而後謾而止之不畢祝詛也。索

隱曰韋昭云謾相抵闌也說文云謾欺也謂初相約共行祝後相欺誑中道而止之也吏以為大逆

其有他言而吏又以為誹謗此細民之愚無知

抵死朕甚不取自今以來有犯此者勿聽治九

月初與郡國守相為銅虎符竹使符應劭曰銅虎符第一至第

五國家當發兵遣使者至郡合符符合乃聽受之竹使符皆以竹箭五枚長五寸鐫刻篆書第一至第五張晏曰符以代

古之珪璋從簡易也。索隱曰漢舊儀銅虎符發兵長六寸竹使符出入徵發說文云符分而合之小顏云右留京師左與之古今註云銅虎符銀錯書之張晏云銅取其同心也

三年十月丁酉晦日有食之十一月上曰前日計遣列侯之國或辭未行丞相朕之所重其爲朕率列侯之國絳侯勃免丞相就國以太尉賴陰侯嬰爲丞相罷太尉官屬丞相四月城陽王章薨淮南王長與從者魏敬殺辟陽侯審食其五月匈奴入北地居河南爲寇帝初幸甘泉

蔡邕

曰天子車駕所至民臣以爲僥倖故曰幸至見令長三老官屬親臨軒作樂賜食帛越巾刀佩帶民爵有級數或賜田租之半故因是謂之幸。索隱曰應劭云甘泉宮名在雲陽一名林光臣瓚云甘泉山名林光秦離宮名又顧氏按邢承宗

西征賦註云甘泉水名今按因地有甘泉以名山則山水皆通也

六月帝曰漢與匈奴

約爲昆弟毋使害邊境所以輸遺匈奴甚厚今

右賢王離其國將衆居河南降地非常故往來

近塞捕殺吏卒驅保塞蠻夷令不得居其故陵

轢邊吏入盜甚敖無道非約也其發邊吏騎八

萬五千詣高奴遣丞相潁陰侯灌嬰擊匈奴匈

奴去發中尉

漢書百官表曰中尉秦官

材官屬衛將軍軍長安

辛卯帝自甘泉之高奴因幸太原見故羣臣皆

賜之舉功行賞諸民里賜牛酒復晉陽中都民

正義曰故城在汾州平遙縣西南十三里

三歲留游太原十餘日濟北王

興居聞帝之代欲往擊胡乃反發兵欲襲滎陽

於是詔罷丞相兵遣棘蒲侯陳武爲大將軍將

十萬往擊之祁侯賀徐廣曰姓縉以文帝十一年卒謚曰敬。索隱曰漢書音義祁音遲

賀姓縉縉古國夏同姓也。正義曰括地志云并州祁縣城晉大夫祁奚之邑爲將軍軍滎陽

七月辛亥帝自太原至長安廼詔有司曰濟北

王背德反上誑誤吏民爲大逆濟北吏民兵未

至先自定及以軍地邑降者皆赦之復官爵與

王興居去來亦赦之徐廣曰去來來也駟案張晏曰雖始與興居反今降赦之八

月破濟北軍虜其王赦濟北諸吏民與王反者

六年有司言淮南王長廢先帝法不聽天子詔

居處母度出入擬於天子擅為法令與棘蒲侯
 太子奇謀反遣人使閩越及匈奴發其兵欲以
 危宗廟社稷羣臣議皆曰長當弃市帝不忍致
 法於王赦其罪廢勿王羣臣請處王蜀嚴道都
 都徐廣曰漢書本或作却字或直云棘都乃本是西南
 都夷爾時未通嚴道有棘山正義曰其恭反括地志
 云嚴道今為縣即州所理縣也縣有蠻夷曰道故曰嚴道
 印都縣本都國漢為縣今雋州也西南夷傳云滇池以北君
 長以十數印都最大是也按羣臣請處淮南王長蜀之嚴道
 不爾更遠印都西有印棘山也又云印棘山在雅州榮經
 縣界榮經武德年間置本秦嚴地華陽國志云印榮山故印
 人後人界也山巖峭峻曲回九折乃至上下有礙冰按即王
 尊登者也今從九折西南行至雋
 州山多雨少晴俗呼名為漏天

帝許之長未到處所

行病死上憐之後十六年追尊淮南王長謚為

厲王立其子三人爲淮南王

索隱曰名安阜陵侯也

衡山王

索隱曰名勃安陽侯也

廬江王

索隱曰名賜周陽侯也

十三年夏上曰蓋聞天道禍自怨起而福繇德

興百官之非宜由朕躬今祕祝之官移過于下

應劭曰祕祝之官移過于下國家諱之故曰祕

以彰吾之不德朕甚不取其

除之五月齊太倉令淳于公有罪當刑

索隱曰名意爲齊太

倉令故謂之倉公也

詔獄逮徙繫長安太倉公無男有女五

人太倉公將行會逮罵其女曰生子不生男有

緩急非有益也其少女緹縈

索隱曰緹音啼鄒氏音體也

自傷

泣乃隨其父至長安上書曰妾父爲吏齊中皆

稱其廉平今坐法當刑妾傷夫死者不可復生
刑者不可復屬雖復欲改過自新其道無由也
妾願沒入為官婢贖父刑罪使得自新書奏天
子天子憐悲其意乃下詔曰蓋聞有虞氏之時
畫衣冠異章服以為儆正義曰晉書刑法志云三皇
而民知禁犯黥者卑其巾犯劓者丹其服犯贖者墨其體犯
宮者雜其屨大辟之罪殊刑之極布其衣裾而無領緣投之
於市與而民不犯何則至治也今法有肉刑三李
曰約法三章無肉刑文帝則有肉刑孟康曰黥劓二左右趾
合一九三。索隱曰韋昭云斷趾黥劓之屬崔浩漢律序云
文帝除肉刑而宮不易張斐註而姦不止其咎安在哉
云以姦亂人族類故不易之也乃朕德薄而教不明歟吾甚自愧故夫馴道不

純而愚民陷焉詩曰愷悌君子民之父母今人有過教未施而刑加焉或欲改行爲善而道不由也朕甚憐之夫刑至斷支體刻肌膚終身不息何其楚痛而不德也豈稱爲民父母之意哉其除肉刑上曰農天下之本務莫大焉今勤身從事而有租稅之賦是爲本末者毋以異李奇曰本其於勸農之道未備其除

農也末賈也言農與賈俱出租無異也故除田租

田之租稅

十四年冬匈奴謀入邊爲寇攻朝那塞殺北地都尉卬徐廣曰姓孫封其子單爲餅侯匈奴所殺上乃遣三將軍軍隴西

北地上郡中尉周舍爲衛將軍郎中令張武爲
車騎將軍軍渭北車千乘騎卒十萬帝親自勞
軍勒兵申教令賜軍吏卒帝欲自將擊匈奴羣
臣諫皆不聽皇太后固要帝如淳曰必不得自征也帝乃止
於是以前東陽侯張敖爲大將軍成侯赤徐廣曰姓
董也爲內史欒布爲將軍擊匈奴匈奴遁走春上
曰朕獲執犧牲珪幣以事上帝宗廟十四年于
今歷日縣長以不敏不明而久撫臨天下朕甚
自愧其廣增諸祀墮場珪幣昔先王遠施不求
其報望祀不祈其福右賢左戚韋昭曰右猶高左猶下也。索隱曰劉德

云先賢後親也

先民後已至明之極也今吾聞祠官祝釐

如傳曰釐福也賈誼傳受釐坐宣室○索隱曰音禧福也

皆歸福朕躬不為百姓朕

甚愧之夫以朕不德而躬享獨美其福百姓不

與焉是重吾不德其令祠官致敬毋有所祈是

時北平侯張蒼為丞相方明律歷魯人公孫臣

上書陳終始傳五德事

索隱曰五行之德帝王相承傳易終而復始故云終始傳

五德之事傳音轉也

言方今土德時土德應黃龍見當改正

朔服色制度天子下其事與丞相議丞相推以

為今水德始明正十月上黑事以為其言非是

請罷之

十五年黃龍見成紀

韋昭曰成紀縣屬天水

天子乃復召魯

公孫臣以為博士申明土德事於是上乃下詔

曰有異物之神見于成紀無害於民歲以有年

朕親郊祀上帝諸神禮官議毋諱以勞朕

漢書音義

曰言無所諱勿以朕為勞

有司禮官皆曰古者天子夏躬親禮

祀上帝於郊故曰郊於是天子始幸雍郊見五

帝以孟夏四月荅禮焉趙人新垣平以望氣見

因說上設立渭陽五廟

韋昭曰在渭城

欲出周鼎當有

玉英見

瑞應圖云玉英五常並修則見

十六年上親郊見渭陽五帝廟亦以夏荅禮而

尚赤

十七年得玉杯

應劭曰新垣平詐令人獻之

刻曰人主延壽於是

天子始更為元年

索隱曰秦本紀惠文王十四年更為元年又汲冢竹書魏惠王亦有後元

當取法於此又按封禪書以新垣平候日再中故改元也

令天下大酺其歲新垣

平事覺夷三族後二年上曰朕既不明不能遠

德是以使方外之國或不寧息夫四荒之外不

安其生

索隱曰碩翁按爾雅孤竹北戶西王母曰下謂之四荒也

封畿之內勤勞

不處二者之咎皆自於朕之德薄而不能遠達

也間者累年匈奴並暴邊境多殺吏民邊臣兵

吏又不能諭吾內志以重吾不德也夫久結難

連兵中外之國將何以自寧今朕夙興夜寐勤

勞天下憂苦萬民為之怛惕不安未嘗一日忘

於心故遣使者冠蓋相望結軼音轍於道韋昭曰使車往還故

轍如結也相如曰結執還轍○索隱曰鄒氏軼音逸以諭漢書作轍顧氏按司馬彪云結謂車轍回旋錯結也

朕意於單于今單于反古之道計社稷之安便

萬民之利親與朕俱棄細過偕之大道結兄弟

之義以全天下元元之民索隱曰戰國策云制海內子元元非兵不可高誘註

云云元元善也又按姚察云古者謂人云善人也因善為元故云云黎元其言元元者非一人也碩野王云元元猶喁喁可憐

愛貌未安其說聊記異也和親已定始于今年後六年冬匈奴

三萬人入上郡三萬人入雲中以中大夫令勉

徐廣曰衛尉改名也駟案漢書百官表景帝初改衛尉為中大夫令非此年也。索隱曰中大夫令是官號勉其名後此官改為光祿勳虞世南以此稱中大夫令是史家追書耳顏遊秦以令是姓勉是名為中大夫據風俗通令姓令尹子文

後之為車騎將軍軍飛狐

如淳曰在代郡蘇林曰在上黨

故楚相蘇

意為將軍軍句注

應劭曰山險名也鴈門陰館。索隱曰伏儼句音俱包愷音鈞也

將

軍張武屯北地河內守周亞夫為將軍居細柳

徐廣曰在長安西駟案如淳曰長安圖細柳舍在渭北近石

傲張揖曰在昆明池南今有柳市是也。索隱曰按三輔故事細柳在直城門外阿旁宮西北維又匈奴傳云細柳在長安西如淳云在渭北非也

宗正劉禮為

將軍居霸上祝茲侯

徐廣曰表作松茲侯姓徐名捍

軍棘門

徐廣曰在渭北

駟案孟康曰在長安北秦時宮門也如淳曰三輔黃圖棘門在橫門外

以備胡數月胡人

去亦罷天下旱蝗帝加惠令諸侯毋入貢弛山

澤

韋昭曰弛廢發其常禁以利民

減諸服御狗馬損郎吏負發倉

庾

應劭曰水漕倉曰庾胡公曰在邑曰倉在野曰庾。索隱曰郭璞註三倉云庾倉無屋也胡公名廣後漢太尉作漢

官解

以振貧民民得賣爵

索隱曰崔浩云富人欲爵貧人欲錢故聽買賣孝

文帝從代來即位二十二年宮室苑囿狗馬服

御無所增益有不便輒弛以利民嘗欲作露臺

徐廣曰露一作靈。索隱曰頃氏按新豐南驪山上猶有臺之舊址也

召匠計之直百金

上曰百金中民十家之產吾奉先帝宮室常恐

羞之何以臺為上常衣絺衣

如淳曰賈誼云身衣卑絺

所幸慎

夫人令衣不得曳地幃帳不得文繡以示躬朴

為天下先治霸陵皆以瓦器不得以金銀銅錫

爲飾不治墳欲爲省毋煩民南越王尉佗自立
爲武帝然上召貴尉佗兄弟以德報之佗遂去
帝稱臣與匈奴和親匈奴背約入盜然令邊備
守不發兵深入惡煩苦百姓吳王詐病不朝就
賜几杖羣臣如表盎等稱說雖切常假借用之

蘇林曰假音休假
借音以物借人

羣臣如張武等受賂遺金錢覺

上乃發御府金錢賜之以愧其心弗下吏專務

以德化民是以海內殷富興於禮義後七年六

月己亥帝崩於未央宮

徐廣曰年四十七

遺詔曰朕聞蓋

天下萬物之萌生靡不有死死者天地之理物

孝文紀

之自然者奚可甚哀當今之時世咸嘉生而惡死厚葬以破業重服以傷生吾甚不取且朕既不德無以佐百姓今崩又使重服久臨以離寒暑之數哀人之父子傷長幼之志損其飲食絕鬼神之祭祀以重吾不德也謂天下何朕獲保宗廟以眇眇之身託于天下君王之上二十有餘年矣賴天地之靈社稷之福方內安寧

贊曰方四

方也內中也猶云中外也

靡有兵革

徐廣曰一云方內安兵革息

朕既不敏常

畏過行以羞先帝之遺德維年之久長懼于不終今乃幸以天年得復供養于高廟朕之不明

與嘉之

如淳曰與發聲也得卒天年已善矣

其奚哀悲之有其令天

下吏民令到出臨三日皆釋服毋禁取婦嫁女

祠祀飲酒食肉者自當給喪事服臨者皆無踐

服凌曰踐翦也謂無斬衰也孟康曰踐跳也晉灼曰漢語作跳跳徒跳也。索隱曰漢語是書名荀爽所作

經帶

無過三寸毋布車及兵器

應劭曰無以布衣車及兵器也不施輕車介士也

毋發人男女哭臨宮殿宮殿中當臨者皆以旦

夕各十五舉聲禮畢罷非旦夕臨時禁毋得擅

哭已下服大紅十五日小紅十四日纖七日釋

服

服凌曰當言大功小功布也纖細布衣也應劭曰紅者中祥大祥以紅為領緣也纖者禫也凡三十六日而釋服。

索隱曰已下謂柩已下於壙劉德云紅功也男功非一故以工力為字而女工唯在於絲故以系工為字三十六日以日

也易月佗不在令中者皆以此令比率從事布告

天下使明知朕意霸陵山川因其故應劭曰因山為藏不復起

墳山下川流不遏絕也就其水名以為陵號。索隱曰霸陵是水名水徑於山亦曰霸山即芷陽地也毋有所

改歸夫人以下至少使應劭曰夫人以下有美人良人八子七子長使少使凡七輩皆

遣歸家重絕人類也令中尉亞夫為車騎將軍屬國悍徐廣曰姓

徐駟案漢書百官表典屬國秦官掌蠻夷降者為將屯將軍李奇曰馮奉世為右將軍以將屯將

軍為名此監主諸屯也郎中令武為復土將軍如淳曰主穿壙填瘞事者。索

隱曰復音伏謂穿壙出土下棺已而填之即以為墳故云復土復反還也又音福發近縣見卒萬

六千人發內史卒萬五千人索隱曰百官表云內史掌理京師之官景帝更

名京兆尹藏郭穿復土屬將軍武乙巳漢書云乙巳葬皇甫謐曰霸陵

去長安七十里

羣臣皆頓首上尊號曰孝文皇帝太子即

位于高廟丁未襲號曰皇帝孝景皇帝元年十

月制詔御史蓋聞古者祖有功而宗有德應劭曰始取天

下者為祖高帝稱高祖是也始治天下者為宗文帝稱太宗是也制禮樂各有由聞歌

者所以發德也舞者所以明功也高廟酎張晏曰正月旦

作酒八月成名曰酎酎之言純也至武帝時因八月嘗酎會諸侯廟中出金助祭所謂酎金也奏武德文

始五行之舞孟康曰武德高祖所作也文始舜舞也五行

籥五行舞冠冕服法五行色見禮樂志。索隱曰應劭云禮

樂志文始舞本舜韶舞高祖更名文始示不相襲五行舞本

周武舞秦始皇更名五行舞按今言奏武德文始五行之舞

者其樂摠象武王樂言高祖以武定天下既示不相襲其作

樂之始先奏文始以羽籥衣文繡居先次即奏五行五行即武舞執干戚而衣有五行之色也孝惠廟酎

奏文始五行之舞孝文皇帝臨天下通關梁不

異遠方張晏曰孝文十二年除關不用傳令遠近若一除誅謗去肉刑賞賜

長老收恤孤獨以育羣生減嗜欲不受獻徐廣曰減

一作不私其利也罪人不帑蘇林曰刑不及妻子不誅無罪

除肉刑出美人重絕人之世朕既不敏不能識

此皆上古之所不及而孝文皇帝親行之德厚

侔天地李奇曰作齊等利澤施四海靡不獲福焉明象乎

日月而廟樂不稱朕甚懼焉其為孝文皇帝廟

為昭德之舞文穎曰景帝采高祖武德舞作昭德舞舞之於文帝廟見禮樂志以明休

德然後祖宗之功德著於竹帛施於萬世永永

無窮朕甚嘉之其與丞相列侯中二千石禮官
具爲禮儀奏丞相臣嘉等言陛下永思孝道立
昭德之舞以明孝文皇帝之盛德皆臣嘉等愚
所不及臣謹議世功莫大於高皇帝德莫盛於
孝文皇帝高皇廟宜爲帝者太祖之廟孝文皇
帝廟宜爲帝者太宗之廟天子宜世世獻祖宗
之廟郡國諸侯宜各爲孝文皇帝立太宗之廟
諸侯王列侯使者侍祠天子歲獻祖宗之廟

張晏

曰王及列侯歲時遣使詣京師侍祠助祭也如淳曰若光武廟在章陵南陽太守稱使者往祭是也不使侯王祭者諸侯不得祖天子也凡臨

祭祀宗廟皆爲侍祭

請著之竹帛宣布天下制曰可

太史公曰孔子言必世然後仁

孔安國曰三十年曰世如有受命王者必

三十年仁

善人之治國百年亦可以勝殘去殺

王肅

曰勝殘暴之人使不為惡去殺不用殺也

誠哉是言漢興至孝文四十有

餘載德至盛也廩廩鄉改正服封禪矣謙讓未成於今嗚呼豈不仁哉

索隱述贊曰

孝文在代

兆遇大橫

宋昌建策

絳侯奉迎

南面而讓

天下歸誠

務農先籍

布德偃兵

除帑削謗

政簡刑清

絺衣率俗

露臺不營

法寬張武

獄恤緹縈

霸陵如故

千年頌聲

史伍阡陸伯柒拾玖字

註肆阡肆伯柒拾伍字

孝文本紀第十

史記十

孝景本紀第十一

史記十一

孝景皇帝者

漢書音義曰諱啓。正義曰諡法曰絲義而濟曰景。

孝文之中子

也。母竇太后。孝文在代時。前后有二男及竇太后得幸。前后死。及三子更死。故孝景得立。

元年四月乙卯。赦天下。乙巳。賜民爵一級。五月。除田半租。為孝文立太宗廟。令羣臣無朝賀。匈奴入代。與約和親。

二年春。封故相國蕭何孫係為武陵侯。

徐廣曰。漢書亦作係。

鄒誕生本作係。音奚。又案漢書功臣表及蕭何傳皆云孫嘉。疑其人有二名。索隱註同。

男子二十而

得傳。

索隱曰。音附。荀悅云。傳正卒也。小顏云。舊法二十三而傳。今改也。

四月壬午。孝文

太后崩

索隱曰薄后也葬芷陽西曰少陵也

廣川長沙王皆之國

索隱曰廣

川王彭祖長沙王發皆景帝子遣就國

丞相申屠嘉卒八月呂御史大

夫開封侯陶青為丞相彗星出東北秋衡山雨

雹

正義曰兩于付反

大者五寸深者二尺熒惑逆行守北

辰月出北辰間歲星逆行天廷中置南陵及內

史役羽為縣

徐廣曰地理志云文帝七年置駟案地理志百官表南陵縣文帝置也分內史為左

右及役羽為縣皆景帝二年不得皆如徐所云○索隱曰鄉誕生役音都會反又音丁活反羽音羽又音詔

三年正月乙巳赦天下長星出西方天火

徐廣曰漢志無

燔雒陽東宮大殿城室

徐廣曰雒一作淮○索隱曰漢書作淮陽王宮災故徙王

於魯也

吳王濞

正義曰音披備反高祖兄仲子故漢高祖十二年封二十二年反年表云都吳其實在江

都楚王戊

正義曰高祖弟楚王交孫嗣二十一年反都彭城

趙王遂

正義曰高祖孫幽王友子

嗣二十六年反都邯鄲

膠西王卬

正義曰卬五郎反高祖孫齊悼惠王悼惠王子故昌侯十年反都密

濟南王辟光

正義曰辟音壁高祖孫齊悼惠王子故初侯立十一年反括地志云濟南

密縣故城在淄川長山縣西北三十里

菑川王賢

正義曰高祖孫齊悼惠王子故武城侯立十一年反都劇

括地志云菑州縣也故劇城在青州壽光縣南三十一里故紀國

膠東王雄渠

正義曰高祖孫齊悼

惠王子故白石侯立十一年反都即墨故城在密州膠水縣東南六十里即膠東國

反發兵

西鄉天子為誅晁錯遣表安諭告不止遂西圍

梁

正義曰梁孝王都睢陽今宋州

上乃遣大將軍竇嬰嬰太尉周亞

夫將兵誅之六月乙亥赦三軍及楚元王子執

等

正義曰藝雲魚曳反字亦作藝雲音同

與謀反者封大將軍竇嬰嬰為

魏其侯

正義曰地理志云魏其屬琅耶

立楚元王子平陸侯

正義曰應

劭云平陸西河縣

劉禮為楚王

索隱曰韋昭云平陸西河縣禮即向之從曾祖王父也

立

皇子端為膠西王子勝為中山王徙濟北王志

正義曰濟子禮反濟北國今濟州廬縣即濟北王所都

為菑川王淮陽王餘

正義

曰淮陽國今陳州

為魯王

正義曰今充州曲阜縣

汝南王非

正義曰汝南國今豫州

為江都王

正義曰江都國今揚州也吳王濞所都反誅景帝改為江都國封皇子非也

齊王

將廬

正義曰齊國青州臨淄也將廬齊悼惠王之孫襄王之子年表云

燕王嘉皆薨

徐廣曰表云五年薨。索隱曰廬悼惠王孫齊王襄之子漢書作問嘉劉澤之子

四年夏立太子立皇子徹為膠東王六月甲戌

赦天下後九月更以弋陽為陽陵

正義曰括地志云漢景帝陵也

在雍州咸陽縣東三十里按杜作壽陵也復置津關用傳出入應劭曰文帝十二年
除關無用傳至此復置傳以七國新反備非常也張晏曰傳信也若今過所也如淳曰傳音檄傳而傳兩行書繒帛分持其一出入關合之乃得過謂冬以趙國為邯鄲郡地

志趙國景帝以爲邯鄲郡

五年三月作陽陵

索隱曰景帝豫作壽陵也按趙系家趙肅侯十五年起壽陵後代因之也

渭橋五月募徙陽陵予錢二十萬江都大暴風

從西方來壞城十二丈丁卯封長公主子嬌為

隆慮侯

索隱曰音林間避場帝諱改之

徙廣川王為趙王

六年春封中尉趙綰為建陵侯

正義曰括地志云建陵故縣在沂州

承縣

江都丞相嘉

徐廣曰姓程

為建平侯隴西太守渾

邪為平曲侯

正義曰括地志云平曲縣故城在瀛州文安縣北七十里

趙丞相嘉徐廣

曰姓

蘇為江陵侯故將軍布為郇侯梁楚二王皆

薨後九月伐馳道樹殖蘭池

徐廣曰殖一作填。正義曰按馳道天子秦始皇

皇作之丈而樹

七年冬廢栗太子為臨江王

正義曰臨江忠州縣雖王臨江而都江陵

十

二月晦日有食之春免徒隸作陽陵者丞相青

免二月乙巳以太尉條侯

正義曰條田彫反字亦作條音同

周亞

夫為丞相四月乙巳立膠東王太后為皇后

索隱

曰按系家太后槐里人父仲兄信封蓋侯后故金氏妻女弟姁兒也

丁巳立膠東王為太

子名徹

中元年封故御史大夫周苛孫平

徐廣曰一作應索隱曰苛周

昌之

為繩侯故御史大夫周昌子左車為安陽

侯四月乙巳赦天下賜爵一級除禁錮地動衡

山原都雨雹大者尺八寸

中二年二月匈奴入燕遂不和親三月召臨江

王來即死中尉府中夏立皇子越為廣川王子

寄為膠東王封四侯

文穎曰楚相張尚太傅趙夷吾趙相建德內史王惲此四人各諫其

王無使反不聽皆殺之故封其子。索隱曰韋昭云張尚子當居趙夷吾子周建德子橫王惲子奔

九月甲

戌日食

中三年冬罷諸侯御史中丞春匈奴王二人率

其徒來降皆封為列侯

正義曰漢書表云中三年安陵侯子軍栢侯賜適侯陸疆

容城侯徐慮易侯僕日范陽侯代翕侯邯鄲七人以匈奴立王降皆封為列侯按紀言二人者是匈奴二王為首降

皇子方乘為清河王三月彗星出西北丞相周

亞夫死以御史大夫桃侯劉舍為丞相四月地

動九月戊戌晦日食軍東都門外

按三輔黃圖東出北第一門曰

宣平門外曰東都門。索隱註同

中四年三月置德陽宮

贊曰是景帝廟也帝自作之諱不言廟故言宮西京故事

云景帝廟為德陽宮大蝗秋赦徒作陽陵者

中五年夏立皇子舜為常山王封十侯

正義曰惠景間年表

云亞王侯盧他之龍盧侯陳留嬌乘氏侯劉買栢邑侯劉明蓋侯王信按其五人是中元五年封餘檢不獲中元三年匈奴

奴王二人降封為列侯惠景間表云匈奴王降為侯者有七人疑其五人是十侯之數

六月丁巳赦

天下賜爵一級天下大潦更命諸侯丞相曰相秋地動

中六年二月己卯行幸雍郊見五帝三月雨雹

四月梁孝王

正義曰都睢陽今宋州

城陽共王

正義曰城陽今濮州雷澤縣古城陽

也共音恭盜法嚴敬故事曰恭

汝南王比景薨立梁孝王子明為濟

川王

正義曰表云分梁置也

子彭離為濟東王

正義曰表云分梁置也

子定

為山陽王

正義曰地理志云景帝中六年別為山陽國屬兗州

子不識為濟陰

王

正義曰地理志云景帝中六年別為濟陰國屬兗州案今曹州是也

梁分為五封四侯

更命廷尉為大理將作少府為將作大匠主爵

中尉為都尉

漢書百官表曰主爵中尉秦官掌列侯

長信詹事

漢書百官表曰

詹事秦官掌皇后太子家應劭曰詹省也給也墳曰茂陵書詹事秩二千石

為長信少府

張晏

曰以太后所居宮為各長信宮則曰長信少府

將行為大長秋

漢書

百官表曰將行秦官

大行為行人

服虔曰天子死未有謚稱大行晉灼曰禮有大

應劭曰長秋皇后卿是官名掌九儀之制以賓諸侯。索隱曰鄭玄云命者五謂

行小行主謚官故以此名之如淳曰不反之辭也墳曰大行

公侯伯子男爵者四

孤卿大夫士是九也

奉常為太常

漢書百官表曰奉常秦官掌宗廟禮儀

典客為大行

索隱曰韋昭云大行官名秦時云典客景帝初改云大行後更名大鴻臚武帝因而不改

故漢書景紀有大鴻臚

百官表又云武帝改名大鴻臚臚附也

以言其掌四夷賓客若皮臚之在外附於身也復有大行

令故諸侯薨大鴻臚奏謚列侯薨則大

行奏誄按大行令即鴻臚之屬官也

治粟內史為大

農

漢書百官表曰治粟內史秦官掌穀食也

以大內為二千石

京師府藏

韋昭曰大內

置左右內官屬大內

索隱曰主天子之私財曰小內小內即屬大內也

七月

辛亥日食八月匈奴入上郡

後元年冬更命中大夫為衛尉

正義曰漢書百官表云衛尉秦官掌宮闈

門衛屯兵景帝初更名中大夫分後元年復為衛尉

三月丁酉赦天下賜爵一

級中二千石諸侯相爵右庶長四月大酺五月

丙戌

徐廣曰丙一作甲

地動其蚤食時復動上庸地動二

十二日壞城垣七月乙巳日食丞相劉舍免八

月壬辰以御史大夫綰為丞相封為建陵侯

索隱

曰姓

後二年正月地一日三動郅將軍

正義曰郅真栗反郅都傳云匈奴

奴刻木為郅郅而射不中擊匈奴酺五日令內史郡不得食馬

粟没入縣官令徒隸衣七綬布正義曰衣於既反綬祖工反綬八十

縷也與布相似七升布用五百六十縫止馬春索隱曰止人為馬春粟為歲不登也為歲不

登禁天下食不造歲省列侯遣之國晉灼曰文紀遣列侯之國

今又三月匈奴入鴈門十月租長陵田大旱衡

山國河東雲中郡正義曰衡山國今衡州河東今蒲州雲中郡今勝州民疫

後三年十月日月皆食赤五日十二月晦雷徐廣

曰一作雷字又作圖字實所未詳日如昴系五星逆行守太微月貫

天庭中索隱曰天庭即龍星右角也按石氏星傳曰龍在左角曰天田右角曰天廷正月甲

寅皇太子冠甲子孝景皇帝崩皇甫謐曰帝以孝惠七年生年四十

八遺詔賜諸侯王以下至民為父後爵一級天

下戶百錢出宮人歸其家復無所與太子即位

是為孝武皇帝

漢書云二月癸酉帝葬陽陵皇甫謐曰陽陵山方百二十步高十四丈去長安

四十里

三月封皇太后弟蚡

蘇林曰蚡音駝○索隱曰蚡音扶粉反按外戚世家皇太

后母臧兒初嬪王氏生子信而寡更嫁長陵田氏生蚡及勝

為武安侯弟勝為周陽

侯置陽陵

太史公曰漢興孝文施大德天下懷安至孝景

不復憂異姓而晁錯刻削諸侯遂使七國俱起

合從而西鄉以諸侯大盛而錯為之不以漸也

及主父偃言之而諸侯以弱卒以安

索隱曰主父偃上言令天

子下推恩之令令諸侯各得分邑其子弟於是遂弱卒以安也

安危之機豈不以哉

索隱述贊曰景帝即位因脩靜默勉人於農率下以德制度斯創禮法可則一朝吳楚乍起凶慝提局成釁拒輪致惑晁錯雖誅梁城未克條侯出將追奔逐北坐見梟剝立翦牟賊如何太尉後卒下獄惜哉明君斯功不錄

孝景本紀第十一

史記十一

孝武本紀第十二

史記十二

太史公自序曰作今上本紀又其述事皆云今上今天子或有言孝武帝者悉後人所定也張晏曰武紀褚先生補作也褚先生名少孫漢博士也。索隱曰按褚先生補史記合集武帝事以編年今止取封禪書補之信其才之薄也又張晏云褚先生頓川人仕元成間韋稜云褚顓家傳褚少孫梁相褚大弟之孫宣帝時為博士寓居于沛事大儒王式故號為先生續太史公書阮季緒亦以為然

孝武皇帝者

漢書音義曰諱徹。正義曰謚法云克定禍亂曰武。

孝景中子也

索隱曰按景十三王傳廣川王已上皆是武帝兄自河間王德以至廣川九有八人則帝第九也

母曰王

太后孝景四年以皇子為膠東王孝景七年栗

太子廢為臨江王以膠東王為太子孝景十六

年崩太子即位為孝武皇帝

張晏曰武帝以景帝元年生七歲為太子為太

子十歲而景帝崩時年十六矣孝武皇帝初即位尤敬鬼神之祀

元年漢興已六十餘歲矣徐廣曰六十七年歲在辛丑天下又

安薦紳之屬索隱曰薦音搢搢挺也言挺笏於紳帶之間事出禮內則今作薦者古字假借耳漢

書作縉紳臣贊云縉赤白色非也。正義曰又音魚廢反比皆望天子封禪改正度

也而上鄉儒術招賢良趙綰王臧等以文學為

公卿欲議古立明堂城南以朝諸侯索隱曰城南長安城南門

外也關中記云明堂在長安城門外杜門之西草廵狩封禪改歷服色事未

就會竇太后治黃老言不好儒術使人微得趙

綰等姦利事徐廣曰纖微伺察之召案綰臧綰臧自殺正義

曰漢書孝武帝二年御史大夫趙綰坐請無奏事太皇太后及郎中令王臧皆下獄自殺應劭云王臧儒者欲立明堂辟

雍太后素好黃老術非薄五經因欲絕奏事太后太后怒故令殺諸所興為者皆發後

六年竇太后崩其明年上徵文學之士公孫弘

等明年上初至雍郊見五時正義曰時音止括地志云漢五帝時在岐州雍

縣南孟康云時者神靈之所止或曰以雍州雍縣南孟康云

時者神靈上帝也按五時者廊時密時吳陽時北時先是文

公作廊時祭白帝秦宣公作密時祭青帝秦靈公作吳陽

上時下時祭祭赤黃帝漢高祖作北時祭黑帝是五時也

常三歲一郊是時上求神君正義曰漢武帝故事云

陵女子也先是嫁為人妻生一男數歲死女子悼痛之歲中

亦死而靈宛若祠之遂聞言宛若為生民人多往請福說家

人小事有驗平原君亦事之至後子孫尊貴及上即位太后

延於宮中祭之聞其言不見其人至是神君求出乃營栢梁

臺舍之初霍去病微時自禱神君及見其形自修飾欲與去

病交接去病不肯謂神君曰吾以神君精潔故齋戒祈福今

欲媼此非也自絕不復

往神君慙之乃去也

舍之上林中躡氏觀徐廣曰躡音啼○索

隱曰鄒誕生音斯
又音蹄觀名也

神君者長陵女子以子死悲哀

故見神於先後宛若

孟康曰產乳而死兄弟妻相謂先
後宛若○索隱曰鄒誕生音先後

並去聲即今妯娌也孟康以兄弟妻
相謂也韋昭云先如後娣宛若音寃

宛若祠之其室民

多往祠平原君往祠

徐廣曰武帝外祖母也駟案蔡邕
曰異姓婦人以恩澤封者曰君儀

比長公主○索隱曰徐云
武帝外祖母則是臧兒也

其後子孫以尊顯及武帝

即位則厚禮置祠之內中聞其言不見其人云

是時而李少君亦以祠竈穀道卻老方見上

李

曰食穀道引或曰辟穀不食之道○索隱曰如淳云祠竈可
以致福按禮竈者老婦之祭盛於盆尊於瓶說文周禮以竈

祠祝融淮南子炎帝作火官死為今之竈神司馬
彪註莊子云浩竈神也如美少女衣赤李弘範音浩

上尊之

少君者故深澤侯

徐廣曰姓趙
景帝時絕封

入以主方

徐廣曰進
納於天子

而主方一云侯人主方駟案如淳曰侯家人主方藥者也匿其年及所生長常自

謂七十能使物卻老如淳曰物鬼物也其游以方徧

諸侯無妻子人聞其能使物及不死更饋遺之

常餘金錢帛衣食人皆以為不治產業而饒給

又不知其何所人愈信爭事之少君資好方善

為巧發竒中如淳曰時時發言有所中也嘗從武安侯飲索隱曰服

度云田蚡也韋昭云武安屬魏郡坐中有年九十餘老人少君乃

言與其大父游射處老人為兒時從其大父行

識其處一坐盡驚少君見上上有故銅器問少

君少君曰此器齊相公十年陳於栢寢服虔曰地名有臺也

瓚曰晏子書栢寢臺名也。正義曰括地志云栢寢臺在青州千乘縣東北二十一里。韓子云景公與晏子遊於少海登栢寢之臺而望其國。公曰美哉堂乎！後代孰將有此？晏子云其田氏乎？公曰寡人有國而田氏家柰何？對曰奪之則近賢遠不肖，治其煩亂，輕其刑罰，服窮乏恤孤寡，行恩惠，崇節儉，雖十田氏其如堂何？即此也。已而案其刻

果齊栢公器一宮盡駭以少君為神數百歲人也。少君言於上曰：祠竈則致物，致物而丹砂可化為黃金，黃金成以為飲食器，則益壽益壽而海中蓬萊僊者可見，見之以封禪，則不死。黃帝是也。臣嘗游海上，見安期生。索隱曰：服虔云古之真人。正義曰：列仙傳云安期生，琅耶阜鄉亭人也。賣藥海邊，秦始皇請語，三夜賜金數千萬，出於阜鄉亭，皆置去，留書以赤玉舄一重為報。曰：後千歲求我於蓬萊山下。食巨棗大如瓜。安期生僊者，通蓬萊

中合則見人不合則隱於是天子始親祠竈龜而

遣方士入海求蓬萊安期生之屬而事化丹砂

諸藥齊為黃金矣

索隱曰齊音分劑之劑

居久之李少君病

死

正義曰漢書起居云李少君將去武帝夢與共登嵩高山半道有使乘龍時從雲中云太一請少君帝謂左右將舍

我去矣數月而少君病死又發棺看唯衣冠在也

天子以為化去不死也而

使黃鍾

韋昭曰人姓名正義音直偽反

史寬舒受其方

漢書音義曰二人皆

方士。正義曰姓史名寬舒

求蓬萊安期生莫能得而海上燕

齊怪迂之方士多相效更言神事矣亳人薄誘

忌

徐廣曰一云亳人謬忌也。索隱曰亳山陽縣名姓謬名忌居亳故下稱薄忌此文則衍薄字而謬又誤作誘也

奏祠泰一方曰天神貴者泰一

索隱曰按樂汁微圖云紫微宮北極天一

太一宋均以為天一太一北極之別名春秋緯云紫極之別名又云紫宮天皇曜魄寶之所理也

泰一佐

曰五帝

正義曰五帝五天帝也國語云蒼帝靈威仰赤帝

書帝命驗云蒼帝名靈威仰赤名文祖黃帝名神汁白帝名顯紀黑帝名玄矩佐者謂配祭也

古者天子

以春秋祭泰一東南郊用太牢具七日

徐廣曰一云日一太

牢具

為壇開八通之鬼道於是天子令太祝立

其祠長安東南郊常奉祠如忌方其後人有上

書言古者天子三年一用太牢具祠神三一天

一地一泰一天子許之令太祝領祠之忌泰一

壇上如其方後人復有上書言古者天子常以

春秋解祠祠黃帝用一梟破鏡

孟康曰梟鳥名食母破鏡獸名食父

黃帝欲絕其類使百物祠皆用之破鏡如龜而虎眼或云直用破鏡如淳曰漢使東郡送梟五月五日為梟羹以賜百官以惡鳥故食之

冥羊用羊祠

服虔曰神明也

馬行

正義曰

用一青牡

馬泰一臯山山君地長

正義曰丁丈反三並神名

用牛武夷君

正義曰

用乾魚陰陽使者以一牛

漢書音義曰

令祠

官領之如其方而祠於忌泰一壇旁其後天子

苑有白鹿以其皮為幣

索隱曰按食貨志幣以白鹿皮方尺緣以續以薦璧得以

黃金一斤代之又漢律皮幣率鹿皮方尺直金一斤以發瑞應造白金焉

正義曰白

金三品武帝所鑄也如淳曰雜鑄銀錫為白金也平準書云造銀錫為白金以為天用莫如龍地用莫如馬人用莫如龜

故曰白金三品其一曰重八兩圓之其丈龍名曰白選直三千二曰重差小方之其丈馬直五百三曰復小隨之其丈龜

直三百錢譜云白金第一其形圓如錢肉好圓丈為一龍白銀第二其形方小長肉好亦小長好上下文為二馬白銀第

三其形似龜肉好其明年郊雍獲一角獸若鹿然

小是文為龜甲也韋昭曰楚人謂麋為鹿○索隱曰鹿音步交反按韋昭云體

若麋而一角春秋所謂有麋而角是也楚人謂麋為鹿又周書王會云鹿者若鹿爾雅云麋大鹿也牛尾一角郭璞云漢武獲一角獸若鹿謂之麟是也

有司曰陛下肅祗郊祀上帝報享錫一角獸蓋麟云

正義曰漢書終軍傳云從上雍獲白麟一角於是以為仁

一牛以燎正義曰力賜諸侯白金以風符應合于

天地晉灼曰符瑞也贊曰風於是濟北王以為天子

且封禪乃上書獻泰山及其旁邑天子受之更

以他縣償之常山王有臯遷天子封其弟於真

定以續先王祀而以常山為郡然後五嶽皆在

天子之郡其明年齊人少翁

正義曰漢武故事云少翁年二百歲色如童子

以鬼神方見上上有所幸王夫人

徐廣曰齊懷王閔之母也駟案

相譚新論云武帝有所愛幸姬王夫人窈窕
好容質性嫺佞。正義曰漢書作李夫人

夫人卒少翁

以方術蓋夜致王夫人及竈鬼之貌云天子自

帷中望見焉於是乃拜少翁為文成將軍賞賜

甚多以客禮禮之文成言曰上即欲與神通宮

室被服不象神神物不至乃作畫雲氣車及各

以勝日

漢書音義曰如火勝金用丙與丁日不用庚辛

駕車辟惡鬼又作甘

泉宮中為臺室畫天地泰一諸神而置祭具以

致天神居歲餘其方益衰神不至乃為帛書以

飯牛

正義曰飯房晚反書綸帛上為怪言語以飼牛

詳弗知也言此牛腹中

有奇殺而視之得書書言甚怪天子疑之有識

其手書問之人果為書於是誅文成將軍

正義曰漢

武故事云文成誅月餘日使者藉負關東還逢之於漕亭還見言之上乃疑發其棺無所見唯有竹筒一枚捕驗間無蹤

跡而隱之其後則又作栢梁桐柱承露仙人掌

之屬矣

蘇林曰仙人以手掌擎盤承甘露也。索隱曰服虔云用梁栢頭按今字皆作栢三輔故事云臺高

二十丈用香栢為殿梁香聞十里中建章宮承露盤高三十丈丈七圍以銅為之上有仙人掌承露和玉屑飲之故張衡

賦曰立脩莖之仙掌承雲表之清露是也

文成死明年天子病鼎湖甚

晉灼

曰在湖縣韋昭曰地名近宜春。索隱曰湖縣名屬京兆後屬弘農昔黃帝採首陽山銅鑄鼎於湖曰鼎湖即今之湖城

縣也韋昭以為近宜春亦甚踈

巫醫曾無所不致至不愈游水發根

服虔曰游水縣名發根人名姓晉灼曰地理志游水水名在臨淮浦也。索隱曰顏師古以游水姓發根名蓋或因水為姓或曰發樹根也。乃言曰上郡有巫病而鬼下之上召置

祠之甘泉及病使人問神君

韋昭曰即病巫之神

神君言曰

天子毋憂病病少愈強與我會甘泉於是病愈

遂幸甘泉病良已

孟康曰良已蓋已愈也

大赦天下置壽宮

神君

服虔曰立此便宮也贊曰宮奉神之宮也楚辭曰蹇將謬兮壽宮

神君最貴者大

夫其佐曰大禁司命之屬皆從之非可得見聞

其音與人言等時去時來來則風肅然也居室

帷中時晝言然常以夜天子被然後入

漢書音義曰崇絜自

被除然

因巫為主人關飲食所欲者言行下

李奇曰神

所欲言上又置壽宮北宮正義曰括地志云壽宮北宮皆在雍州長安縣西北三十

里長安故城中漢書云武帝壽宮以處神君張羽旗設供具以禮神君神

君所言上使人受書其言命之曰書法漢書音義曰或云策

書之法也。正義曰其所語世俗之所知也母絕殊書音獲按畫一之法

者而天子獨喜其事秘世莫知也其後三年有

司言元宜以天瑞命不宜以一二數蘇林曰得黃龍鳳皇諸瑞

以名年。正義曰孝景以前即位以一二數年至其終武帝即位初有年號改元以建元為始一元曰建

元二元以長星曰元光三元以郊得一角獸曰

元狩云徐廣曰案諸紀元光後有元朔元朔後得元狩其明年冬天子郊雍

議曰今上帝朕親郊而后土母祀則禮不答也

有司與太史公

韋昭曰說者以談為太史公失之矣史記稱遷為太史公者是外孫楊惲所稱

○索隱曰姚察按司馬遷傳亦以談為太史公非惲所加又按虞喜志林云古者主天官皆上公自周至漢其職轉卑然朝會坐位猶居公上尊天之道其官屬仍以舊名尊而稱公公名當起於此故如淳云太史公位在丞相上天下郡國計書先上太史公副上丞相其義是也而相譚新論以為太史公造書書成示東方朔朔為平定因署其下太史公者皆東方朔所加之也楊惲繼此而稱耳

祠官寬舒等議天地牲角繭栗

今陛下親祀后土后土宜於澤中園立為五壇

壇一黃犢太牢具已祠盡瘞而從祠衣上黃於

是天子遂東始立后土祠汾陰睢上

徐廣曰元鼎四年時也駟

案蘇林曰睢音誰如淳曰河之東岸特堆堀長四五里廣二里餘高十餘丈汾陰縣在睢之上后土祠在縣西汾在睢之北西流與河合也○索隱曰漢書舊儀作葵上者蓋河東人呼誰與葵同故耳

如寬舒等議上

親望拜如上帝禮禮畢天子遂至滎陽而還過
雒陽下詔曰三代邈絕遠矣難存其以三十里
地封周後為周子南君以奉先王祀焉是歲天
子始巡郡縣侵尋於泰山矣

索隱曰侵尋即浸淫也故晉灼云遂淫之意也

小顏云浸淫漸染之義蓋尋淫聲相近假借用耳師古叔父遊秦亦解漢書故稱師古為小顏也

其春樂

成侯

徐廣曰姓丁名義後與樂大俱誅也。索隱曰韋昭云河間縣按郊祀志樂成侯登而徐廣據表云姓丁

名義未詳耳

上書言樂大樂大膠東宮人

服虔曰故嘗王家人

與文成將軍同師已而為膠東王尚方而樂成

侯姊為康王后

孟康曰膠東王后也

母子康王死他姬子立

為王而康后有淫行與王不相中得相危以法

康后聞文成已死而欲自媚於上乃遣樂大因
樂成侯求見言方天子既誅文成後悔恨其早
死惜其方不盡及見樂大大悅大爲人長美言
多方略而敢爲大言處之不疑大言曰臣嘗往
來海中見安期羨門之屬索隱曰韋昭云羨門古顧
仙人應劭云名子高顧
以爲臣賤不信臣又以爲康王諸侯耳不足予
方臣數言康王康王又不用臣臣之師曰黃金
可成而河決可塞不死之藥可得僊人可致也
臣恐效文成則方士皆掩口惡敢言方哉上曰
文成食馬肝死耳子誠能脩其方我何愛乎大

曰臣師非有求人人者求之陛下必欲致之則

貴其使者令有親屬以客禮待之勿卑使各佩

其信印乃可使通言於神人神人尚肯邪不邪

致尊其使然後可致也於是上使先驗小方闕

旗旗

正義曰音其文本或作綦說文云棋博綦也高誘註淮南子云取雞血與針磨擣之以和磁石用塗其額

曝乾之置局上即相拒不止也

自相觸擊是時上方憂河決而黃

金不就

正義曰鍊丹砂金錫為黃金不就

乃拜大為五利將軍居

月餘得四金印佩天士將軍地士將軍大通將

軍天道將軍印制詔御史昔禹疏九江決四瀆

間者河溢臯陸隄繇不息

正義曰顏師古云臯水旁地也廣平曰陸言水大汎

溢自臯及陸而築作堤
禹役甚多不暇休息

朕臨天下二十有八年天若

遺朕士而大通焉

韋昭曰言樂大能通天意故封樂
通。索隱曰樂通在臨淮高平縣乾

稱蜚龍鴻漸于般

漢書音義曰般水涯堆也漸進也武
帝云得樂大如鴻進於般一舉千里

得道若飛
龍在天

意庶幾與焉其以二千戶封地士將軍

大為樂通侯

韋昭曰樂通
臨淮高平也

賜列侯甲第

漢書音義曰
有甲乙第次

故曰僅千人乘輿斤車馬

漢書音義曰或云斤不用
也韋昭曰嘗在服御。索

隱曰孟康云斤不
用之車馬是也

帷帳器物以充其家又以衛長

公主妻之

孟康曰衛太子姊如淳曰衛太子姊也蔡邕曰
帝女曰公主公主主儀比諸侯姊妹曰長公主主儀

此諸侯王駟案此帝女
也而云長公主未詳

齊金萬斤更名其邑曰當利

公主

地理志云東
萊有當利縣

天子親如五利之第使者存問

所給連屬於道自大主

徐廣曰武帝姑也駟案韋昭曰竇太后之女也

將相

以下皆置酒其家獻遺之於是天子又刻玉印

曰天道將軍使使衣羽衣夜立白茅上五利將

軍亦衣羽衣立白茅上受印以示弗臣也而佩

天道者且爲天子道天神也於是五利常夜祠

其家欲以下神神未至而百鬼集矣然頗能使

之其後治裝行東入海求其師云大見數月佩

六印貴振天下而海上燕齊之間莫不搯挽

曰滿手曰搯玃曰搯執持也

而自言有禁方能神僊矣其夏六

月中份陰巫錦

應劭曰錦巫名

爲民祠魏睢后土營旁

應劭

曰魏故魏國也
肱若丘之類

見地如鉤狀培視得鼎

索隱曰說文
培把也音步

溝反

鼎大異於衆鼎文鏤無款識

韋昭曰款刻也○
索隱曰識猶表識

怪

之言吏吏告河東太守勝勝以聞天子使使驗

問巫錦得鼎無姦詐乃以禮祠迎鼎至甘泉從

行上薦之

如淳曰以鼎從行上至
甘泉將薦之於天也

至中山

徐廣曰河渠
書鑿涇水自

中山西○索隱曰此山在馮翊谷口縣西近九峻山土人呼
為中山河渠書韓使水工鄭國說秦鑿涇水自中山山西即此

也晏溫

如淳曰三輔謂日出清濟為晏晏而溫
也○索隱曰許慎註淮南云晏無雲也

有黃雲

蓋焉有鹿過上自射之因以祭云至長安

徐廣曰
上言從

行薦之或
曰祭鼎子

公卿大夫皆議請尊寶鼎天子曰間者

河溢歲數不登故巡祭后土祈為百姓育穀今

年豐廡未有報鼎曷為出哉有司皆曰聞昔太

帝興神鼎一

索隱曰師古以太帝即太昊伏羲氏以文在黃帝之前故也

一者一統

天地萬物所繫終也黃帝作寶鼎三象天地人

也禹收九牧之金鑄九鼎皆嘗鴈亨

徐廣曰亨莫也鴈音鴈皆

嘗以烹牲牢而祭祀也○索隱曰言鼎以烹牲而饗嘗也鴈字又作鴈音殤漢書郊祀志云鼎空足曰鬲以象二德鬲音

歷謂足中不實者名之也

上帝鬼神

服虔曰以祭祀上帝或曰嘗烹酌也

遭聖則興

曰遭逢也鼎雖淪泗水逢聖興起故出汾陰西至甘泉也

遷于夏商周德衰宋之

社亡

正義曰社主民也社以石為之宋社即亳社也周武王伐紂乃立亳社以為監戒覆上棧下使通天地陰陽之

氣周禮衰國將危民故宋之社為亡形復也

鼎乃淪伏而不見頌云自堂

徂基

正義曰此以下至胡考之休是周頌絲衣之詩自堂從內往外基門內塾也鄭玄云門側之堂謂之塾釋

禮輕使士升堂視壺濯及饗豆之屬降牲於
熟牲自羊但牛充包乃舉鼎告潔禮之次也
自羊但牛正義

曰自堂往塾先視羊後及韋昭曰爾雅云鼎
牛也毛萇云先小後大也

上謂不虞不醵胡考之休索隱曰毛詩傳云吳譁也

之為吳音供霸反說文以吳一口大言也此作虞者與
吳聲相近故假借也或者本文借此虞為驪娛字也

至甘泉光潤龍變承休無疆合茲中山有黃白

雲降韋昭曰與中山所蓋若獸為符服虔曰雲若獸在

辭也或曰符謂瑞應也路弓乘矢韋昭曰路大集獲壇下報祠

大饗食徐廣曰一云惟受命而帝者心知其意服虔

祖受命知之也而合德焉鼎宜見於祖禰藏於帝

廷以合明應制曰可入海求蓬萊者正義曰蓬萊

方丈瀛洲勃

海中三神山也言蓬萊不遠而不能至者殆不見其氣上

乃遣望氣佐候其氣云其秋上幸雍且郊索隱曰以雍地

形高故云上或曰五帝泰一之佐也宜立泰一而上親

郊之上疑未定齊人公孫卿曰今年得寶鼎其

冬辛巳朔旦冬至與黃帝時等卿有札書曰黃

帝得寶鼎斯宛侯問於鬼史區漢書音義曰區黃帝時人。索隱曰鄭玄云黃

帝佐也李奇曰黃帝時諸侯本作申區者非藝文志作鬼容區也區對曰黃帝得寶鼎

神策是歲己酉朔旦冬至得天之紀終而復始

於是黃帝迎日推策後率二十歲正義曰率音律又音類又所律

反三音並通後皆放此也得朔旦冬至凡二十推三百八十年

黃帝僊登于天卿因所忠欲奏之所忠視其書
不經疑其妄書謝曰寶鼎將事已決矣尚何以爲
卿因嬖人奏之上大說召問卿對曰受此書申
功封禪書功字作公申公已死上曰申功何人也卿曰申

功齊人也與安期生通受黃帝言無書獨有此
鼎書曰漢興復當黃帝之時漢之聖者在高祖
之孫且曾孫也寶鼎出而與神通封禪封禪七
十二王正義曰河圖云王者封太山禪梁父易姓登崇有七十二君也唯黃帝得上泰

山封申功曰漢主亦當上封上封則能僊登天
矣黃帝時萬諸侯而神靈之封居七千應劭曰黃帝時諸侯

會封禪者七千人李奇曰說仙道得封者
七千國張晏曰神靈之封謂山川之守天下名山八而

三在蠻夷五在中國中國華山首山太室泰山

東萊此五山黃帝之所常遊與神會黃帝且戰

且學僊患百姓非其道乃斷斬非鬼神者百餘

歲然後得與神通黃帝郊雍上帝宿三月鬼吏

區號大鴻死葬雍故鴻冢是也蘇林曰今雍有鴻冢其後黃

帝接萬靈明廷明廷者甘泉也所謂寒門者谷

口也徐廣曰寒一作塞漢書音義曰黃帝仙於寒門也。索隱曰服虔云寒門黃帝所僊之處小顏云谷中山之谷

口漢時爲縣今呼爲冶谷去甘泉八十里盛夏凜然故曰寒門黃帝采首山銅鑄鼎

於荆山下晉灼曰地理志首山屬河東蒲阪荆山在馮翊懷德縣鼎既成有龍

垂胡顙下迎黃帝

索隱曰顙師古云胡謂顙下垂肉也顙其毛也故童謠曰何當爲君鼓龍

也胡是

黃帝上騎羣臣後宮從上龍七千餘人龍

乃上去餘小臣不得上乃悉持龍顙龍顙拔墮

正義曰徒果反

黃帝之弓百姓仰望黃帝既上天乃抱其

弓與龍胡顙號

正義曰戶高反下同

故後世因名其處曰鼎

湖

正義曰括地志云湖水原出號州湖城縣南三十五里夸父山北流入河即鼎湖也

其弓曰烏號

於是天子曰嗟乎吾誠得如黃帝吾視去妻子

如脫躡耳乃拜卿爲郎東使候神於太室上遂

郊雍至隴西西登空桐

正義曰空桐山在原州平高縣西一百里

幸甘泉

令祠官寬舒等具泰一祠壇壇放薄忌泰一壇

壇三垓

徐廣曰垓次也駟案李奇曰垓重也三重壇也○索隱曰鄒氏云垓一作陔言壇階三重

五帝

壇環居其下各如其方黃帝西南除八通鬼道

服虔曰坤位在未黃帝從土位

泰一所用如雍一時物而加醴棗

脯之屬殺一犂牛以為俎豆牢具而五帝獨有

俎豆

韋昭曰無犂牛醴之屬

醴進

索隱曰師古云具俎豆酒醴而進之一曰進謂雜物之具所以加禮

也其下四方地為餼食

索隱曰餼音竹芮反謂聯續而祭之漢志作𦍋古字亦通說文

云餼祭酹也○正義曰劉伯莊云謂繞壇設諸神祭座相連綴也

羣神從者及北斗云

已祠胙餘皆燎之其牛色白鹿居其中羣在鹿

中水而洎之

徐廣曰洎音居器反肉汁也駟案晉灼曰此說合牲物燎之也○正義曰劉伯莊云以大

羹和祭食燎之按以鹿內牛中以羣內鹿中水立酒也

祭日以牛祭月以羊羣特

索隱曰特一牲也言若牛若羊若燕止一特也泰一祝宰則衣紫及繡五帝

各如其色日赤月白十一月辛巳朔旦冬至昧

爽天子始郊拜泰一朝朝日夕夕月應劭曰天子春秋朝日秋夕

月拜日東門之外朝日以朝夕月以夕贊曰漢儀郊泰一時皇帝平旦出竹宮東向揖日其夕西向揖月便用郊日不用

春秋也則揖而見泰一如雍禮其贊饗曰天始以

寶鼎神策授皇帝朔而又朔終而復始皇帝敬

拜見焉而衣上黃其祠列火滿壇旁壇旁煮炊

具有司云祠上有光焉公卿言皇帝始郊見泰

一雲陽正義曰括地志云漢雲陽宮在雍州雲陽縣北八十一里有通天臺即黃帝以來祭天園丘之處武

帝以五月避暑有司奉瑄玉孟康曰璧大六寸謂之瑄音宣嘉

牲薦饗

正義曰漢書儀云祭天養牛五歲至二千斤

是夜有美光及晝黃

氣上屬天太史公祠官寬舒等曰神靈之休祐

福兆祥宜因此地光域

徐廣曰地一作夜

立泰時壇以明

應令太祝領祀及臘間祠三歲天子一郊見其

秋為伐南越告禱泰一以牡

徐廣曰一作牡

荆畫幡

如淳曰荆

之無子者皆以繫齊之道也晉灼曰牡荆節間不相當者韋昭曰以牡荆為柄者也

日月北斗登龍

以象天一二三星為泰一鋒

徐廣曰天官書曰天極星明者泰一常居也斗口二

星曰天一駟案晉灼曰畫一星在後三星在前為太一鋒也

名曰靈旗

正義曰李奇云畫旗樹泰一壇

上名靈旗畫日月北斗登龍等

為兵禱

正義曰為于偽反

則太史奉以指所

伐國

正義曰韋昭云牡剛也荆強按用牡荆指伐國取其剛為編故畫此旗指之

而五利將

軍使不敢入海之泰山祠上使人微隨驗實無

所見五利妄言見其師其方盡多不讎上乃誅

五利

正義曰漢武故事云東方朔言樂大無狀上發怒乃斬之

其冬公孫卿候神河

南見僊人跡緱氏城上有物若雉往來城上天

子親幸緱氏城視跡問卿得毋效文成五利乎

卿曰僊者非有求人主人主求之其道非少寬

假神不來言神事事如迂誕

正義曰迂音于誕音但迂遠也誕大也

積

以歲乃可致於是郡國各除道繕治宮觀名山

神祠所以望幸矣其年既滅南越上有嬖臣李

延年以好音見上善之下公卿議曰民間祠尚

有鼓舞之樂今郊祠而無樂豈稱乎公卿曰古

者祀天地皆有樂而神祇可得而禮或曰泰帝

使素女索隱曰亦謂太昊。正義曰泰帝謂太昊伏羲氏鼓五十弦瑟悲帝

禁不止故破其瑟為二十五弦於是塞南越禱

祠泰一后土始用樂舞益召歌兒作二十五弦

徐廣曰瑟也及箏瑟侯瑟自此起徐廣曰應劭云武帝令樂人侯調始造箏瑟侯其來

年冬上議曰古者先振兵澤旅徐廣曰古釋字作澤然後封

禪乃遂北巡朔方勒兵十餘萬還祭黃帝冢橋

山澤兵湏如李奇曰地名也上曰吾聞黃帝不死今有冢

何也或對曰黃帝已僊上天羣臣葬其衣冠既

至甘泉為且

正義曰為于偽反將偽封禪也

用事泰山

正義曰道書福地記云泰山高

四千九百丈二尺周迴二千里

先類祠泰一

自得寶鼎

上與公卿

諸生議封禪

正義曰白虎通云王者易姓而起天下太平功成封禪以告太平禪梁父之趾廣厚

也刻石紀號著己之功績天以高為尊地以厚為德故增泰山之高以放天禪梁甫之趾以報地封者附廣之禪者將以

功相傳授之

封禪用希曠絕莫知其儀禮而羣儒采

封禪尚書周官王制之望祀射牛事

蘇林曰當祭

除不祥瓚曰射牛示親殺也○索隱曰天子射牛示親殺也事見國語

齊人丁公年九十

餘曰封者合不死之名也秦皇帝不得上封陞

下必欲上稍上即無風雨遂上封矣上於是乃

令諸儒習射牛草封禪儀

索隱曰見應劭漢官儀也

數年至且

行天子既聞公孫卿及方士之言黃帝以上封
禪皆致怪物與神通欲放黃帝以嘗接神僊人
蓬萊士高世比德於九皇

張晏曰三皇之前有人皇九首章昭曰上古人皇者

九人也

而頗采儒術以文之羣儒既以不能辯明

封禪事又牽拘於詩書古文而不敢騁上為封

祠器示羣儒羣儒或曰不與古同徐偃又曰太

常諸生行禮不如魯曾善周霸屬蜀圖封事

服虔曰屬會也

會諸儒圖封事

於是上紂偃霸盡罷諸儒弗用三月遂

東幸緱氏禮登中嶽

文穎曰崧高山也在潁川陽城縣

太室

韋昭曰崧高山

有大室少室之山山有石室故以名之

從官在山下聞若有言萬歲云

正義曰漢儀注云有稱萬歲可十萬人聲問上上不言問下下不言於是

以三百戶封太室奉祠命曰崇高邑正義曰顏師古云以崇奉

嵩高山故謂之崇高也東上泰山山之草木萊未生乃令人

上石立之泰山顛上遂東巡海上行禮祠八神

文穎曰武帝登泰山祭太一井祭名山於泰壇西南開除八通鬼道故言八神也一曰八方之神○素隱曰韋昭云八神

謂天地陰陽日月星辰主四時之屬今按郊祀志一曰天主祠天齊二曰地主祠太山梁父三曰兵主祠蚩尤四曰陰主

祠三山五曰陽主祠之累六曰月主祠之萊山七曰日主祠盛山八曰四時主祠琅邪齊人之上疏

言神怪奇方者以萬數然無驗者乃益發船令

言海中神山者數千人求蓬萊神人公孫卿持

節常先行候名山至東萊言夜見一人長數丈

就之則不見見其跡甚大類禽獸云羣臣有言

見一老父牽狗言吾欲見巨公

漢書音義曰巨公謂武帝

已忽

不見上既見大跡未信及羣臣有言老父則大

以爲僊人也宿留海上與方士傳車及間使求

僊人以千數四月還至奉高上念諸儒及方士

言封禪人人殊不經難施行天子至梁父禮祠

地主乙卯令侍中儒者皮弁薦紳射牛行事封

泰山下東方如郊祠泰一之禮封廣丈二尺高

九尺其下則有玉牒書書祕禮畢天子獨與侍

中奉車子侯

漢書百官表曰奉車都尉掌乘輿車武帝初置韋昭曰子侯霍去病之子也

上

泰山亦有封其事皆禁明日下陰道丙辰禪泰

山下陞東北肅然山如祭后土禮天子皆親拜

見衣上黃而盡用樂焉江淮閒一茅三脊

孟康曰所

謂靈茅也為神藉五色土益雜封縱遠方奇獸蜚禽

及白雉諸物頗以加祠兕旄牛犀象之屬弗用

皆至泰山然後去封禪祠其夜若有光晝有白

雲起封中天子從封禪還坐明堂

漢書音義曰天子初封泰山山

東北陞古時有明堂處則此所坐者明年秋乃作明堂羣臣更上壽於是制詔御

史朕以眇眇之身承至尊兢兢焉懼弗任維德

菲薄不明于禮樂脩祀泰一若有象景光屑如

九
史記卷六十九

有望

璣曰聞呼萬歲者三

依依震於怪物欲止不敢遂登封

泰山至於梁父而后禪肅然

服虔曰肅然山名在梁父

自新嘉

與士大夫更始賜民百戶牛一酒十石加年八

十孤寡布帛二匹復博奉高蛇丘

鄭玄曰蛇音移

歷城毋

出今年租稅其赦天下如乙卯赦令行所過毋

有復作事在二年前皆勿聽治又下詔曰古者

天子五載一巡狩用事泰山諸侯有朝宿地其

令諸侯各治邸泰山下

正義曰諸侯各於太山朝宿地起第佳擬天子用事太山

而居

天子既已封禪泰山既無風雨蓄而方士

更言蓬萊諸神山若將可得於是上欣然庶幾

遇之乃復東至海上望異遇蓬萊焉奉車子侯

暴病一日死上乃遂去並海上北至竭石巡自

遼西歷北邊至九原五月返至甘泉漢書音義曰周萬八千里

也有司言寶鼎出為元鼎以今年為元封元年

其秋有星茀于東井韋昭曰秦分野也後備太子兵亂○茀音佩後十餘

日有星茀于三能韋昭曰三能三公後連坐誅之望氣王朔言候

獨見其星出如瓠素隱曰郊祀志填星出如瓠故顏師古以德星即鎮星今按此紀唯止三言

德星則德星歲星也歲星所在有福故曰德星食頃復入焉有司言曰陛下

建漢家封禪天其報德星云其來年冬郊雍五

帝還拜祝祠泰一贊饗曰德星昭衍厥維休祥壽星

仍出

索隱曰壽星南極老人星也見則天下理安故言之也

淵耀光明信星昭

見

索隱曰信星鎮星也信屬土土曰鎮星漢志為得之

皇帝敬拜泰

徐廣曰一況無此字

之饗其春公孫卿言見神人東萊山若云見天

子天子於是率緹氏城拜卿為中大夫遂至東

萊宿留之

索隱曰音秀留宿留遲待之意若依字讀則言宿而留亦是有所待並通也

數日

母所見見大人跡復遣方士求神怪采芝藥以

千數是歲旱於是天子既出母名乃禱萬里沙

應劭曰萬里沙神祠也在東萊曲城子孟康曰沙徑三百餘里

過祠泰山

鄧展曰泰山自東復有小泰山

瓚曰即今之泰山

還至瓠子

服虔曰瓠子隄名蘇林曰在甄城以南濮陽以北廣百步深五丈所瓚曰所決

何名○索隱註同

自臨塞決河

索隱曰按河渠書武帝自臨塞決河將軍已下皆負薪填之

留

二日沈祠而去

索隱曰按沈白馬祭河決於是作瓠子歌見河渠書

使二卿將卒

塞決河河徙二渠復禹之故跡焉是時既滅南

越越人勇之

韋昭曰越地人名也

乃言越人俗信鬼而其祠

皆見鬼數有效昔東甌王敬鬼壽至百六十歲

後世謾怠故衰耗乃令越巫立越祝祠安臺無

壇亦祠天神上帝百鬼而以雞卜

漢書音義曰持雞用卜如鼠卜○正

義曰雞卜法用雞一狗一生祝願訖即殺雞狗煮熟又祭獨取雞兩眼骨上自有孔裂似人物形則吉不足則凶今嶺南

猶行此法也

上信之越祠雞卜始用焉公孫卿曰僊人

可見而上往常遽以故不見今陛下可為觀如

緄氏城

韋昭曰如猶比也

置脯棗神人宜可致且僊人好

樓居於是上令長安則作蜚廉桂觀

應劭曰飛廉神禽能致風

氣晉灼曰身如鹿頭如雀有角而蛇尾文如豹文也

甘泉則作益延壽觀使卿

持節設具而候神人乃作通天臺

徐廣曰在甘泉索隱曰漢書

作通天臺於甘泉宮按漢書舊儀臺高五十丈去長安二百里望見長安城

置祠具其下將

招來神僊之屬於是甘泉更置前殿始廣諸宮

室

索隱曰姚氏按揚雄云甘泉本因秦離宮既奢泰武帝復增通天高光迎風宮外近則有洪厓旁皇諸胥法遠則

石關封巒枝鵲露寒棠黎師得遊觀屈奇瑰偉又有高華溫德法相曾成宮曰虎走狗天梯瑤臺仙人弩思觀皆壯麗也

夏有芝生殿防內中

徐廣曰元封二年也。索隱曰按生芝九莖作芝房歌

天

子為塞河興通天臺若有光云

李奇曰為此作事而有光應瓚曰作

通天臺也

乃下詔曰甘泉防生芝九莖

應劭曰芝芝草也其莖相連如淳曰

瑞應圖云王者敬事耆老不失舊故則芝草生赦天下毋有復作其明年伐

朝鮮夏旱公孫卿曰黃帝時封則天旱乾封正義

曰乾音干蘇林云天旱欲使封土乾燥也顏師古云三歲不雨暴所封之土令乾鄭氏云但祭不立尸為乾封三年

上乃下詔曰天旱意乾封乎蘇林曰天旱欲使封土乾燥如淳曰但祭不立

尸為其令天下尊祠靈星焉正義曰靈星即龍星也張晏云龍星左角曰天

田則農祥也其明年上郊雍通回中道巡之徐廣曰

見而祭之春至鳴澤服虔曰鳴澤澤名也從西河歸其明年

冬上巡南郡徐廣曰元封五年至江陵而東登禮潛之天

柱山號曰南山嶽應劭曰潛縣屬廬江南嶽霍山也浮江

自尋陽出樅陽地理志廬江有樅陽縣過彭蠡祀其名山川

北至琅邪並海上四月中至奉高脩封焉初天子封泰山泰山東北趾古時有明堂處處險不敞上欲治明堂奉高旁未曉其制度濟南人公玉帶上黃帝時明堂圖索隱曰玉或音肅公玉姓帶名姚氏案風俗通齊湣王臣有公玉冉其後也音語錄反三輔決錄云杜陵有王氏音肅說文以為從玉音畜牧之畜今讀公玉與決錄音同然二姓單復有異單姓者音肅後漢司徒王況是其後也明堂圖中有一殿四面無壁以茅蓋通水圜宮垣為複道上有樓從西南入命曰昆侖索隱曰玉帶明堂圖中為複道有樓從西南入名其道曰昆侖言其似崑崙山之五城十二樓故名之也天子從之入以拜祠上帝焉於是上令奉

高作明堂汶上徐廣曰在元封二年秋如帶圖及五年脩封

則祠泰一五帝於明堂上坐令高皇帝祠坐對
之祠后土於下房以二十太牢天子從崑崙崙道
入始拜明堂如郊禮禮畢燎堂下而上又上泰
山有祕祠其顛而泰山下祠五帝各如其方黃
帝并赤帝而有司侍祠焉泰山上舉火下悉應
之其後二歲十一月甲子朔旦冬至推歷者以
本統天子親至泰山以十一月甲子朔旦冬至
日祠上帝明堂徐廣曰常五年一脩耳每脩封禪其
贊饗曰天增授皇帝泰元神筴索隱曰按贊饗食之辭言天授皇帝泰元神
筴周而復始又按黃帝得寶鼎神筴則太元者古昔周而復
上皇創曆之號故此云太元神筴者周而復始也

始皇帝敬拜秦一東至海上考入海及方士求

神者莫驗然益遣冀遇之十一月乙酉徐廣曰二十一日也

栢梁裁十二月甲午朔上親禪高里伏犧曰山名在秦山下

祠后土臨渤海將以望祠蓬萊之屬冀至殊庭

焉漢書音義曰蓬萊庭○索隱曰冀漢書作幾幾近也冀望也並通服虔曰蓬萊中仙人殊庭者異也言入仙人異域

也上還以栢梁裁故朝受計甘泉正義曰顧胤云栢梁被燒故受

記獻之物於甘泉也顏師古云受郡國計簿也公孫卿曰黃帝就青靈臺十

二日燒徐廣曰日一作月黃帝乃治明庭明庭甘泉也方

士多言古帝王有都甘泉者其後天子又朝諸

侯甘泉甘泉作諸侯邱勇之乃曰越俗有火裁

復起屋必以大用勝服之於是作建章宮

正義曰括

地志曰建章宮在雍州長安縣西二十里長安故城西

度為千門萬戶前殿度高

未央其東則鳳闕高二十餘丈

索隱曰三輔黃圖云武帝營建章起鳳闕

高二十五丈闕中記一名別風闕以言別四方之風西京賦曰閭闔之內別風嶠嶠是也三輔故事云北有園闕高二十

丈上有銅鳳凰故曰鳳闕也

其西則唐中數十里虎圈

索隱曰如淳云詩云

中唐有壁鄭玄曰唐堂庭也爾雅以廟中路謂之唐西京賦曰前開唐中弥望曠象也。正義曰圈其遠反括地志云虎

圈今在長安城中西偏也

其北治大池漸臺

正義曰顏師古云漸浸也臺在池中為水所浸

故曰漸按王莽死此臺也

高二十餘丈名曰泰液

正義曰臣瓚云泰液言象陰陽

津液以作池也

池中有蓬萊方丈瀛洲壺梁象海中神山

龜魚之屬

索隱曰三輔故事云殿北海池北岸有石龜長二丈廣五尺西岸有石龜二枚各長六尺

其

南有玉堂壁門大鳥之屬

索隱曰漢武故事玉堂基與未央前殿等去地十二丈

乃立神明臺

索隱曰漢宮闕疏云臺高五十丈上有九室常置九天道士百人

井幹

樓度五十餘丈輦道相屬焉

索隱曰閼中記宮北有井幹臺高五十丈

積木為樓言築累萬木轉相交架如井幹司馬彪註莊子云井幹井欄也又崔譔云井以四邊為幹猶築牆之有植榦又

諸本多作幹一本作榦音說文云榦井橋

夏漢改曆以正月為歲首而色

上黃官名

徐廣曰一無名字

更印章以五字

張晏曰漢據土德土數五故用

五為印文也若丞相曰丞相之印章諸卿及守相印文不足五字者以之足也

因為太初元年

是歲西伐大宛蝗大起丁夫人

韋昭曰丁姓夫人名也

雒陽

虞初等以方祠詛匈奴大宛焉其明年有司言

雍五時無牢熟具芬芳不備乃命祠官進時犢

牢具五色食所勝

孟康曰若火勝金則祠赤帝以白牲

而以木耦馬代

駒焉

索隱曰一音偶孟康云寓寄龍形於木又姚氏云寓假也以言假木龍馬一駒非寄寓龍馬形於木也

獨五帝用駒行親郊用駒及諸名山川用駒者

悉以木耦馬代行過乃用駒他禮如故其明年

東巡海上考神僊之屬未有驗者方士有言黃

帝時為五城十二樓

應劭曰崑崙崑崙縣圍五城十二樓僊人之所常居也

以候

神人於執期

漢書音義曰執期地名也

命曰迎年

正義曰顏師古云迎年若言祈年

上許作之如方明年上親禮祠上帝衣上黃焉

公玉帶曰黃帝時雖封泰山然風后封鉅

應劭曰封鉅黃

帝師岐伯

正義曰張揖云岐伯黃帝太醫

令黃帝封東泰山禪凡山合

符然後不死焉

徐廣曰在琅邪朱虛縣汶水所出凡山亦在朱虛

天子既令

設祠其至東泰山卑小不稱其聲乃令

祠官禮之而不封禪焉其後令帶奉祠候神物

夏遂還泰山脩五年之禮如前而加禪祠石閭

石閭者在泰山下趾南方方士多言此僊人之

閭也故上親禪焉其後五年復至泰山脩封

徐廣

曰天漢三年李陵以天漢二年敗也

還過祭常山今天子所興祠泰一

后土三年親郊祠建漢家封禪五年一脩封薄

忌泰一及三一冥羊馬行赤星五寬舒之祠官

李奇曰祀名也。索隱曰赤星即上靈星祠也靈星龍左角赤故曰赤星五者太一也三一也冥羊也馬行也赤星也凡

五並令祠官
寬舒領之

以歲時致禮凡六祠

索隱曰五者之外有
正太一后土祠故云

六也

皆太祝領之至如八神諸神明年凡山他名

祠行過則祀去則已方士所興祠各自主其人
終則已祠官弗主他祠皆如其故今上封禪其
後十二歲而還徧於五嶽四瀆矣而方士之候
祠神人入海求蓬萊終無有驗而公孫卿之候
神者猶以大人跡爲解無其效天子益怠厭方
士之怪迂語矣然終羈縻弗絕冀遇其真自此
之後方士言祠神者彌衆然其效可睹矣

徐廣曰猶

今人云其事已可知矣皆不
信之耳又數本皆無可字

太史公曰余從巡祭天地諸神名山川而封禪
焉入壽宮侍祠神語究觀方士祠官之言於是
退而論次自古以來用事於鬼神者具見其表
裏後有君子得以覽焉至若俎豆珪幣之詳獻
酬之禮則有司存焉

索隱述贊曰

孝武纂極

四海承平

志尚奢麗

尤敬神明

壇開八道

接通五城

朝親五利

夕拜文成

祭非祀典

巡乖卜征

聳蒿勒岱

望景傳聲

迎年紀日
事彼邊兵
俯觀羸政

改曆定正
日不暇給
幾欲齊衡

疲耗中土
人無聊生

史陸阡伍伯肆拾貳字

註陸阡玖伯捌拾壹字

孝武本紀第十二

史記十二

[General Information]

SS号=12459884

书名=百衲本二十四史 史记 5 本记

作者=(西汉)司马迁撰

页数=143

出版日期=1936 | 出版社=北京市：商务印书馆

读秀号=000007543960

[朗秀信息]

作者=(西汉)司马迁撰

形态项=128

出版项=北京市：商务印书馆，1936

参考文献格式=(西汉)司马迁撰. 百衲本二十四史 史记 5 本记. 北京市：商务印书馆，1936.

Lrbook=http://book.lrbook.com/showbook.jsp?dxNumber=000007

543960&d=20FF311EC2497859262F6E1137FEDAA3

Duxiu=http://www.duxiu.com/bookDetail.jsp?dxNumber=0000075

43960&d=20FF311EC2497859262F6E1137FEDAA3

Zhizhen=http://www.zhizhen.com/book/7a661434c5d9a62ab296f3

628a875057/detail

jpgUrl=http://image2.5read.com/image/ss2jpg.dll?did=n24&pi

d=8C806DE25AEA4CF0032DFD4EFE2EDD084B583D1A871F477C1C5CBE54

ED7D0B416EC621D706D464AB5CBEDE8937B33D38774741F0941B763CF9

5940ED09005F7FF9D8C687E2A92E2E59E10825305169ACEF133A4A883E

AA44412069A6452839389474339F8D5A169A1AFBD73C8BE298A31152&j

id=/000001.jpg

imgPath=http://***.5read.com/